

秋碧吟廬詩鈔

甲籤

治祖篋



特別
14
3152
78



校了

廣東省立圖書館
11.9.3
圖書部

廣東省立圖書館

廣東省立圖書館

天壽

14
3152
78

春分
左

春分

廬詩鈔

春分

95-138

丁巳三月

黃錄卷



序

予嘗游信濃視山嶽重疊聳於天際乃謂生其土而稟其氣必剛健重厚堅忍不拔發爲偉材可知矣後竊物色其人得久保天隨子天隨信濃高遠人修業大學才富識明好跋涉山河足跡遍于海內尤長聲詩其詩豪宕俊逸感憤激昂有悍馬脫羣奔驥截風之概不可律以法度而操志堅確存心縝密摛藻措詞亦未出于古人矩矱之外喜怒哀樂觸物興感於詩焉發之發必驚人予求之於今世詩人幾不見其匹也頃者天隨錄其平生所作詩古近體若干首題曰秋碧吟廬詩鈔屬序

於予時予有後越之行取道於東山巖越游海府極海山之勝歸途過信濃審峰巒起伏煙雲滃勃之狀喟然嘆曰此可以序天隨詩矣天隨匪獨氣稟之厚且堅其縱橫馳騁之才蓋得諸山嶽者多矣故讀其詩雄篇鉅構磅礴天地者猶駒嶽淺間之盤踞於雲表也其瀟灑迥麗煙波無限者猶鵝湖筑水之潏洄長流也其他近體小作猶幽溪曲磎一丘一壑之美也若夫魁偉絕特盪胸決眦之觀則非海府不能以當而猶有待焉曩者清儒俞曲園就本邦諸家著東瀛詩選推廣瀨吉甫爲第一蓋取其縱橫之才也今以天隨視之吉甫足以雁

行而肩隨矣天隨年方壯氣方銳膂力方剛篇什之富歲以囊計秋燈午夜商摧古今歷涉諸子百家才愈練識愈精陵駕吉甫而稱霸中原予不勝厚望也是爲序
大正丙辰十一月上浣
勺水日下寬撰

萬里著書百篇弱齡而學翫芳華中歲則蕩滌紈綺比
自定秋碧吟廬詩如千首皆愜心貴當之作其爲詩奄
有衆美不名一家以格調論大致得力明七子假塗宋
之四靈而躋於盛唐所謂端莊雜流麗剛健含婀娜方
之吾國康乾諸名輩其殆隨園甌北之仲叔乎天隨幼
學而好游往往以游進其學行年甫四十馬跡遍三山
而未遑稅駕中土爲惜顧其詩中有擬元人十臺懷古
及題韋溫雁門詩集諸什於吾國方輿名勝昔賢著作
三致意焉與君共東海盈盈一衣帶水耳他日攜琴載
鶴惠然肯來凡吾山川風物必有莫逆於心而增益錦

囊佳句者鯁生酷嗜日本櫻花如朱文恭客水戶時昨
今兩春得櫻花詞十六闋自定近詞名餐櫻詞將就天
隨正拍焉其爲沉澁當復何如雲山萬重相思相望亮
天隨有同情也

上元乙卯重陽前三日桂林况周頤夔笙序於海上之
眉隱樓

行矣而萬首之詩未成其不如古人者終是吾性之所不及也歟

大正六年丁巳仲春天隨自識於繡書看劍之小齋

秋碧吟廬詩鈔甲籤目錄

卷一

癸丑 古今體詩一百五十七首

卷二

甲寅 古今體詩二百二首

卷三

乙卯 古今體詩三百三十七首

秋碧吟廬詩鈔甲籤目錄終

秋碧吟廬詩鈔卷一

東京 久保得二 天隨

癸丑

函山魁春樓偶拈兼謝主人

初日梅香嫩。倚欄吟思恬。泉聲疑劈峽。雲氣不離檐。舊
夢詩堪續。新春醉可添。感君懸榻意。貫酒莫相嫌。

古瓢引為池邊藤園義象囑

瓢名桶峽初織田右府破今川氏於桶峽獲諸陣中
故名焉右府傳之豐太閤太閤賜之茶博士千利休
而利休與之其壻京商鴟屋某後二百年賴山陽入

京獲之携而西游至熊本贈儒家某次經福田太華
原田鎮山等數人今歸于池邊藤園屬者藤園自爲
之記普示同人徵題詠予乃賦長古一篇以贈焉
桶峽天黑風雨急三千鐵騎斫營入殺聲捲地梟雄亡
亢龍有悔終靡及始期平安舉凱歌疇昔宴飲興如何
帳下一瓢料未盡積屍成山血欲波織公機略神呵護
報賽還向熱田路馬前懸首腰佩瓢草澤氣習仍如故
回頭妖氛鎖八荒公心更誓靖海疆附驥何人纘遺業
軼群奇才起猴郎猴郎本是牧牛者雲龍變化定天下
千瓢馬表向無前他日威名震華夏驩虞功成文教熙

乃知斯瓢伴宴嬉聚樂秋高觀月夜醍醐春燠賞花時
爾後昇平廿餘紀幾回易主瓢悲喜慘禍絕憐利休翁
文彩孰如外史氏外史慷慨揮筆初夜牕燈火鴨沂廬
磊塊澆來血如沸草得東方相斫書書成文章有光焰
壯游繼發詞華贍瓢亦相隨到鎮西留之或當季子劍
顯晦有時物皆然重經浩劫幸相傳藤園主人今得此
摩挲挂壁喜欲顛興亡一夢難再述微物珍重世無匹
螺盃受酒彷彿看幾個英豪面浮出主人夙稱壇坫雄
昂然意氣凌王公小戶猶解個中趣浩歌日日醅顏紅
我願借之酒爲賭功名富貴何足數吁嗟乎生當醉倒

文君壚畔春。死當化作劉伶墳上土。

輓鹽井雨江

正男

杯酒論交共嘯歌。黃壚今日怯重過。風花本是浮生劫。
容易教人歎逝波。衫角淚痕和雨霑。摧琴餘痛句慵拈。遙思采女池頭水。
綠漲涵愁幾尺添。沈痾半歲藥無靈。天上行車不暫停。一片茶毘煙斷後。
滿山嫩草爲誰青。嫩草山名顰盡龐眉嘔盡心。病中枉作短長吟。吳兒一誦腸應斷。
矧是神交廿歲深。

留題寺壁莫埋塵。末俗文章豈等倫。從是南都花月社。
百年無復主盟人。

絕代驚才名夙馳。忽然凶耗聽猶疑。篋中遺藁須珍重。
一種風流幼婦詞。

文章氣誼感前緣。過眼流光忽十年。錄鬼簿成淒欲絕。
無多知己半黃泉。帷位奠來塵外魂。擲揄路鬼忍重論。玉臺麗句流傳久。
個是才人恨血痕。舊事淒涼隔死生。老成凋謝最傷情。青林黑塞魂來去。
旅櫬明朝返帝京。

寥廓去追鸞鶴群。招魂此夜淚紛紛。屋梁落月澹於影。鬢髯梅邊疑是君。

次森川竹篔

鍵

病中雜句韻却寄

細雨輕寒簾影深。閒添一炷海南沈。倚牀竟日儘無語。賦到傷春便有心。

百花落盡雨聲中。芳草天涯夢欲空。脈脈相思更相望。依依愁水又愁風。

淺夢重簾何限情。幽庭一任亂啼鶯。閒眠休怪日高起。矧聽夜來風雨聲。

病愁如夢酒杯疏。閒煞牀頭數卷書。跪地湘簾深院落。

嫩晴天氣綠陰初。

一年芳事乍消磨。奈此水流花落何。滿砌苔痕煙樣襯。晚來礙得雨聲多。

燕子歸遲日欲斜。悄扶春困倚牕紗。碧桃紅杏看吹墜。腸斷東風取次花。

準擬花前一醉眠。病餘怯值子規天。綺情懨盡劫銷盡。底事傷春賽少年。

詞愁容易鬢毛斑。寂寂柴扃鎖日關。乳燕鳴鳩送春盡。殘花宵蝶夕陽閒。

愁春未醒惜餘春。紅雨一簾嬌帶人。只是風光催老早。

冒

浮生贏得苦吟身。
 花信今番到牡丹。春人愁緒倍多端。輕陰幕幕晚成雨。
 悄倚闌干怯嫩寒。
 雨後無花長綠苔。與誰吟嘯一尊開。斜陽如水暮寒淺。
 剗地鵲愁簾外來。
 午夢初回獨拄頤。吟懷如水澹相宜。筆牀茗椀小牕下。
 低唱新詩簾卸遲。

寄題兵庫福嚴寺老松為寺主蘭岳囑相傳元弘
 帝從隱岐還駐蹕寺中此松即邀叡賞賜敕額蒼
 官護國四大字云

歸

昨從笠置出。今從隱岐還。盤桓重撫孤松憶。零露和淚
 溼御衣。偷安暫時夙志老。葉公好龍何足道。蒼官護國
 將擬誰。枯盡三木與一草。頭白烏啼月明前。頭白烏見
吉野拾遺長在
 櫻花深處眠。此地獨留青蓋古。霜饕雪虐五百年。

東京四時詞二十四首次達澤菖水玄韻

殿宇崢嶸對鳳宮。靈旗晚颭萬梅中。幾多毅魄神游處。
 半夜林梢颯有風。九段

滿山午霽簇紅霞。一路輦塵油壁車。如雪有香風有影。
 鐘聲緩響送飛花。上野

短簫急鼓水邊聞。隔岸塔尖斜日曛。十里長堤羅綺散。

萬櫻影白疊於雲

墨堤

紅酣翠彈幾番新。曲徑短籬長駐春。罨畫樓臺昨游跡。

濃陰晝黯綠楊津。

百花園

隔水煙巒整翠鬟。長汀潮落接晴灣。小姑爭揭羅裙去。

拾貝銀沙錦石間。

品川

一篙煙水漲春川。欲買花來繫畫船。滿檻嫩紅微帶露。

啼妝似媚雨餘天。

四目

洗盡芳塵綠作叢。雨晴清晝度薰風。千株躑躅住餘照。

倒映池心魚影紅。

日比谷

微風漾碧放魚池。無數藤花臨水披。日午行人過橋去。

紫雲堆裏拜崇祠。

龜井戶

俯看明月湧江心。橋上追涼夜正深。乍有畫船移櫂去。

溶溶波碎一川金。

兩國橋

滿汀涼氣雨過餘。薄暮打鮮潮上初。縱使季鷹游早倦。

故江應不憶鱸魚。

月島

松風颯捲石泉飛。竟日貪涼人未歸。試向鴛鴦冢邊過。

草花紅滴欲霑衣。

目黑

開殺當年蘆荻洲。此間酒味可新秋。竹枝聲裏月初上。

脆管嬌絲幾處樓。

洲崎

湖光一片鏡奩開。曙色依稀天女臺。殘月墮煙風露冷。

藕花香漾早涼來

不忍池

潮滿三叉釣艇還。一天露氣月明閒。江心不盡佳人恨。

流向杳茫煙水間。

墨陀川

細徑危橋野水湄。夕陽紅樹蘸清漪。鐘沈魚默寺相近。

時有游人閒打碑。

瀧野川

滿目滄桑幾閱秋。空因題詠記風流。山高月小仍依舊。

橋上行吟閒却舟。

茗溪

搖落千林秋寂寥。儘教詩思上青霄。何侯第宅隔溪水。

燈影琴聲出綺寮。

星岡

塔頂風鈴霽日開。滿林落木積成堆。依稀金碧將軍廟。

晚見神鴉求餌來

芝公園

觚稜日麗紫煙多。四海方聞擊壤歌。識得此中涵帝澤。

御溝水綠靜無波。

二重橋

東台咫尺隔長衢。水映山輝斜照孤。凋盡萬荷枯盡柳。

分明橋影劃平湖。

湯島

雛姬喚客鬢堆鴉。帘影輕颺賣酒家。祠畔日暄春正小。

棠梨幾樹著狂花。

愛宕山

綺閣何人酒禦寒。雪華鋪地夕陽殘。高低臺榭玲瓏色。

恍作水晶宮裏看。

神田

雪霽千家雀噪檐。城中昨夜峭寒添。大悲閣下賽人少。

林表崢嶸一塔尖

淺草

萬點燈光曉未消。霏霏玉屑亂寒霄。夜來暫絕輪蹄響。悄地詩情憶灞橋。

日本橋

清宮詞四十首

清國盛時文字之獄數起。故未聞有作宮詞者也。屬者讀清季稗史數種。三百年間掖庭瑣事遺聞記述極詳。興替之跡。歷歷可徵。但有過誇張者。然亦不失為絕好詩料也。於是擇事新采麗者入詠。得四十首。題曰清宮詞。楊鐵崖云。宮詞詩家之大香奩也。不許村學究語。予詞粗拙。豈敢望之。唯得續史香厓全史。

宮詞則足耳。其注本事於每首後亦倣之云。

一注橫波暗帶愁。將軍底事誤恩讐。連朝苦薦人蓼汁。博得江南二百州。

松山之役。明薊遼總督洪承疇被擄。械至盛京。以死自誓。絕粒累日。皇太極百計勸降。不聽。既而聞其好色。遣寵妃博爾濟吉特氏就謀之。妃密貯人蓼汁於小壺。效婢裝入奉承疇。曰。將軍縱絕粒。獨不可少飲。而後就義耶。語次。意態極悽惋。且以壺承其脣。承疇不得已。少沾飲焉。如是者數日。妃多方勸慰。迭進美饌。承疇意稍轉。遂決計降於清。順治元年。從入關。敘

內院大學士次年出經略江南後再出戡定楚粵滇黔諸省盡平之妃亦以功立爲后其子福臨卽順治帝也

瓊樓天半管絃喧丹詔新宣太后婚多事春官定儀注
嵩呼漫擬父皇尊

順治入關後攝政王多爾袞豔太后色通焉卽其嫂也無幾遂行下嫁禮實王陰慾憑之於群臣也恩詔宣天下有朕不忍太后獨處仰體慈懷敬謹遵行等語時攝政王銜上復增父皇二字及帝長醜之乃削去後託以謀叛追削其封至乾隆思掩其跡仍復之

日日紅衫裛淚痕玉顏憔悴在長門他時重上昭陽殿
顧影徘徊悄不言

順治之后科爾沁部親王吳克善之女也多爾袞視帝如子爲之定婚帝旣長恥多爾袞之所爲遷怒於后隱謫冷宮三年終廢之越五年旋悟其非又復之股釵扇合夙因奇紫玉化煙無限悲佞佛梁家跡相似
清涼山上捨身時

順治十七年八月貴妃董鄂氏卒帝哀悼殊甚諭禮部議謚號後數月遂遁入五臺山祝髮披緇吳梅村清涼山讚佛四詩卽詠此事也或云妃蓋冒辟疆姬

人董小宛也。明弘治末，被掠至京師，入宮賜姓，册立為貴妃。辟疆知之，懼罹大禍，乃撰影梅菴憶語，凡二千四百言，託之已死而梅村所謂墓門深更阻侯門者，亦似有微意。

花外朦朧月似煙，羊車潛到掖門前。儒臣他日講經處，合廢南山詩一篇。

康熙庶妹有殊色，強納之為妃。允禩等即其所出云。昨聞諸將凱歌還，獻馘割生都等閒。後宮新寵袁熙婦，唯得君王一破顏。

三藩之變，人僅知雲南吳氏、福建耿氏、廣東尙氏而

孔有德之壻孫延齡，襲有孔爵，亦助三藩。三藩既平，孫亦授首。孔女四貞，因父舊功，釋而不問。其實康熙已納之宮中矣。

阿監傳呼永巷馳，沈沈玉漏夜深時。紅氈裹得人如玉，却怕龍闈侍寢遲。

康熙定例，后妃宮女進御，當直內監承旨宣召，卸衣裹氈，背負而來，蓋以防不虞云。

燕都花月是邦畿，椎髻弓靴殊俗非。十丈鐵牌長不朽，氈車幸免送明妃。

康熙於宮門外立一鐵牌，大書禁漢裝婦人入宮，故

采選宮女三百年來漢人賴以免

九重深掩夕陰催。天上俄傳薤露哀。悵望寢宮纔咫尺。斧聲燭影儘疑猜。

康熙曩廢太子允禔。他子亦未立。六十一年疾大漸。手書遺詔曰。朕十四皇子。繼承大統。十四皇子。卽允禩也。賢明英毅。嘗統師開邊。甚得西北人心。故帝欲立之。而第四皇子胤禛。偵知遺詔所在。急入侍病。盡屏諸昆季。不許入內。私改十字爲第字。時帝已昏迷。有頃忽醒。見胤禛在側。詢之知實。大怒。投枕擊之。不中。胤禛跪而謝罪。無幾遂殂矣。胤禛襲位。改元雍正。

爾後宮中文牘。遇數目字。必繁畫大寫。亦其絜矩之一端也。

龍精長護御牀頭。白日深宮魑魅愁。百步擊人紅血滴。匣中霜刃劇吳鉤。

雍正性猜忌。伺察極嚴。嘗製殺人一利器。形渾圓似球。中藏快刀。刀旁有機。如彈簧式。俾邏者携之行。或遇有怨仇謀害者。邏者卽暗以其器罩頭。用機一撥。其首已斷入器中。捷飛而逸。雖大庭廣衆之間。亦倉猝不及覺也。一時咸忌憚之。因名其器爲血滴子。朝暮內廷鐘鼓鳴。昔聞妙法說無生。只緣禮佛願歡喜。

日向雍和宮裏行。

清初歷世崇奉喇嘛。至雍正殊甚。敕願之寺遍於輦轂。故俗間有在京和尚出京官之諺。雍和宮中又設佛殿。所列如歡喜佛。尤極穢褻。不堪稱道云。

一朝晏駕。老臣疑翦盡同根。報豈遲。千古快心三寸劍。可憐義憤屬蛾眉。

雍正即位後。漸除諸弟。慘虐殊甚。聞者爲豎髮。岳鍾琪等舉義不成。獄興。辭連呂留良。父子就戮。留良孫女某。尤精劍術。爲祖報仇。遂入宮刺帝。人皆稱其有俠氣。

戲臺紅燭鬪嬋娟。法曲南山韻欲仙。佳氣滿城新點綴。黃樓近與翠亭連。

自古祝壽之盛。未有如乾隆間奢侈者。十六年十一月二十五日。壽母后鈕祜祿氏華甲。分地張燈。剪綵爲花。鋪錦爲屋。自西華門至西直門。凡十餘里。丹碧相映。不可名狀。每數十步。構戲臺。北調南腔。舞衫歌扇。皆爲一時妙選。其景物之點綴。有以色絹爲山岳狀。錫箔爲波濤紋。而廣東之翡翠亭。湖北之黃鶴樓等。殊窮奇巧云。

縹緲颺空絲管音。龍舟繫纜綠楊潯。樊姬進諫非關妬。

遺恨深於汴水深。

乾隆南狩六度頗有愆德南巡錄等皆削而不書蓋欲蔽其醜耳嘗次德州時招妓數十登舟侍讌酒間極嫖褻適孝賢后自他舟來見之語涉刺諷帝疑其妬徑捽其髮以足蹴之后忿恚遂蹈水死帝醒始追悔故節終之典視他后獨隆。

玉潔冰清心事違。慈寧宮裏血霑衣。女貞花落江臯晚。愁絕香魂化蝶飛。

香妃者回部某王妃也殊色聞於世乾隆三十年將軍兆惠征回疆生獲之致於京師帝大喜處之西內。

數年守節不移太后鈕祜祿氏聞之憎甚遂命宮人縊殺之帝爲之不怡者數日今燕都陶然亭北有孤冢乃謂其葬處故以香冢稱焉側有小碣不知何人所建銘止四十五字字摹隋體披草剔蘚尙隱約可辨識曰浩浩愁茫茫劫短歌終明月缺鬱鬱佳城中。有碧血碧亦有時盡血亦有時滅一縷香魂無斷絕。是耶非耶化爲蝴蝶。

玉碎珠沈最斷腸。廿年一夢恨茫茫。死生往復如前約。誰識探環獲鄧郎。

雍正時有一妃貌極姣麗太子年將冠以事入宮過。

妃側見其方對鏡理髮戲白後以兩手掩其目妃大驚遽持梳擊之中額太子覺痛走出翌日月朔往謁母后鈕祜祿氏母后見傷痕詰之却疑妃之調太子立賜死太子大駭欲白其冤不得於是指染硃馳往妃所妃已縵帛氣息垂絕太子乃乘閒以指硃印妃頸且曰我害爾矣魂而有靈俟二十年後其復與吾相聚乎乾隆中葉和坤以滿洲官學生在儀衛中帝嘗見之其貌與妃絕相肖因密召入令跪近御座俯視其頸指痕宛在乃知爲妃之後身也因倍憐惜不數年驟躋相位而坤之貪恣帝雖知之毫不譴責

嘉慶爲太子惡之殊甚卽位後數其二十罪遂誅之滿苑春闌宮市開驚看珍玩積成堆大官人是聖天子福海東邊去又來

唐德宗時有宮市祇宦者爲使白晝至市中左顧右望以抑買人物耳若宮中設市古今唯乾隆行之圓明園福海之東有同樂園每屆新歲特於園中設市凡古玩估衣以及酒肆茶壚無一不備店主俱以宦者爲之皆先期自外城各店肆采擇交入言明其值具於冊售去者給錢存留者還原物大臣以下入園游覽皆競相購買或集而啜餈總與外間等帝時徒

步過之就各肆親檢其簿冊衆音雜遝紛然並作帝每顧而解頤凡九日始輟嘉慶四年帝崩此例乃廢坤寧宮裏夜開筵鼓板聲中唱訪賢從此重門聞爆竹連朝驅鬼送殘年

乾隆朝每歲臘月二十四日之夕祀竈神於坤寧宮帝自臨之坐坑上擊鼓板唱訪賢一曲后亦和之執事官鵠立環聽唱畢送神帝乃還宮是日以後帝臨朝自寢宮至乾清宮每過一門必鳴爆竹一聲蓋謂竈神已送恐有邪鬼成祟欲藉以驚走之也

六十年來雨露滋上皇遜位太平時閒餘慣唱胡僧咒

日倚龍牀開眼遲

乾隆禪位後往往屏侍臣閉目若熟寐而口中喃喃有所語嘉慶嘗侍側雖極力諦聽遂不能解因問和坤對曰上皇所誦者西域祕密咒也誦此咒則所惡之人雖在數千里外當立死即不死亦必有奇禍嘉慶由是知坤亦嫻此術誓必誅之云

賊勢如潮門欲摧殺聲捲地激風雷恍看金甲神無數便擬昭陵石馬來

嘉慶十八年林清之變宮門蹀血禍延三輔經數月始定傳云賊入禁門時恍惚見金甲神自天而降中

有綠袍赤面怒目而視者，卽關羽也。故畏懼奔竄，卒不敢入。既而雷雨交作，殛斃賊徒甚多。帝聞之，以爲天神之協助也。命其子詣昭顯廟，時應宮致謝而壯穆之封號益崇。

卅載臨朝著浣衣，唯言儉德古來稀。如何袞職尊藍面，翻使史魚屍諫非。

道光在位三十年，衣非三澣弗易。宮中用欸，歲不踰二十萬。頌之者，至謂其儉德。三代下第一人。漢文帝宋仁宗，幾莫能及。然不辨忠奸，賢愚穆彰阿爲軍機大臣，妨賢病國。王鼎與之同列，一日廷爭極諫，歸舍。

自縊帝雖震悼優卹，而亦不究其事而止。

嫩涼如水露珠妍，子夜豔歌愁暗牽。長記桐陰深處宿，月明紗帳澹於煙。

那拉氏者，惠徵之女，小字蘭兒，生長南中，少而慧黠，嫿豔無匹。雅善南方諸小曲，咸豐初被選入圓明園，居桐陰深處。帝一日遊園中，聞有歌南調者，心異之，問隨行內監得其人，遂幸之。是爲後年之西太后也。變輿北狩，太匆匆，酣飲都忘國祚窮。一夜內監求鹿血，楸梧雨冷舊離宮。

咸豐頗耽於聲色，體多疾，面常黃，醫謂鹿血可飲，蓋

以補陽分之虛也。於是禁苑中畜鹿百數十，日取其血以進。洪楊之亂，兵革遍於天下，急警日到，帝措而不問。十年七月，英法聯軍焚圓明園，帝避難幸熱河。行宮湫隘，內外防禁不嚴，帝日出游，益溺於聲色。翌年七月，疾大作，急令供鹿血，倉卒不可得，乃殂。水精簾捲，月明涼，照見鴛鴦瓦上霜。連臂宮人歌正斷，秋宵錯怨爲誰長。

安得海者，直隸南皮人也。自宮入內，爲闈官。時西后新寡，年未踰三十，得之歡甚，得海藉是以干國柄，先譖同治短，又籠絡朝臣，勢焰駸駸，殆與明季魏忠賢

埒。帝憎之甚。八年七月，西后命得海往南方，織辨龍衣。帝密詔山東巡撫丁葆禎預爲備，葆禎遣兵執之於濟南。具疏以聞，西后惶駭，不知所爲。東后乃召諸大臣議之，咸言祖制內監不得出都門，犯者死無赦。當就地正法，得海遂伏誅。

斜月綺牕梧葉秋，景陽鐘送五更愁。盈盈天上銀河水，終歲何心限女牛。

同治皇后阿魯特氏，氣度端凝，不苟言笑。帝敬禮之，伉儷甚篤。西后素喜慧妃，至是益忿恚。每皇后入見，不毫假以辭色。謂帝曰：慧妃賢明，宜加眷遇。皇后年

少未嫺禮節，陰使內官嚴監視之。帝大不懌，於是終歲獨宿乾清宮。

白龍魚服夜深時，絲管樓臺月正移。例向金環巷中宿，阿誰好擬李獅獅。

同治獨宿，恹懔無聊。內侍有導爲微行者，帝欣然領之，往往步出內城，日作狹斜游。十三年冬，以患天花痘崩，而人疑其爲陰毒云。

劍履倉皇西闕趨，豔妻方煽大臣愚。黃麻扯裂終無用，徒爾攀髯哭鼎湖。

同治疾大漸，皇后阿魯特氏侍側，會侍郎李鴻藻入

見帝乃與之謀，以貝勒載澍入承大統，且口授遺詔，令鴻藻於榻側書之。凡千餘言，其所以防禁西后者至密。詔成未發，鴻藻既出，徑至西后宮私告之。又出袖中草詔以進，西后大怒，立碎其紙，擲於地。叱鴻藻出。頃刻帝崩。是日薄暮，西后突召諸王大臣等，至養心殿西暖閣。衆先問帝病，西后含笑應曰：「皇帝無恙，良久西后復曰：『聖躬頗虛弱，未有子，脫有不測，必立嗣。卿輩試思其可者，衆無應者。』」西后徐曰：「醇親王之子載湉甚聰睿，吾欲立之爲文宗顯皇帝。嗣卿輩以爲何如？衆皆唯唯無敢違者。西后始厲聲曰：『然則皇

帝已崩矣衆聞之失聲大哭而議既定西后猶恐族人爭立或變生肘腋也令李鴻章統重兵駐京師以備之始宣布其事以明年爲光緒元年東西兩后垂簾聽政如舊越七年東后崩由是西后獨臨朝玉几臨軒呂后瞋千言遺詔禍機新傳哀北闕又餘痛諒闇朝廷未十旬

光緒既立阿魯特氏以事多違遺詔悲痛不禁西后聞之亟召見批其頰曰爾既害我子尙思作太后耶阿魯特氏跪於地泣不止久之始還宮日夕悲啼終歿年僅二十二時大喪未滿百日

焚却瓊函一紙書深宮罷酒共欷歔無端枉殺王皇后正是垂簾得意初

初咸豐殊寵那拉氏立其子載淳爲太子既而惡其漸放縱欲廢之而未果及熱河疾篤密附遺詔於東后鈕祜祿氏曰西后援母以子貴之義不得不並尊爲太后然其人非可倚信他日操行不軌汝宜召集廷臣將朕此旨宣示立賜死以杜後患故同治一朝東后獨主持庶政性亦溫醇篤厚竟無失德既而西后擁立光緒威權赫灼縱恣殊甚東后既老益倦怠而頗懷不平因思所以感悟之一夕置酒宮中爲西

宴

秘苑吟廬詩錄

卷一

后壽既酣屏左右共話咸豐舊事相對悲泣者久之既而袖出一函授西后使觀西后啓視色頓變蓋函中所藏卽咸豐遺詔也東后仍索還焚於燭上曰此紙已無用焚之太佳吾今日亦可以復命先帝於地下矣西后慙憤交并強作感泣態遂罷宴而散無幾西后以餅餌數合進奉東后卽取一二枚食之味殊不適然不至太苦戍刻俄逝矣噫此非中毒而殞歟綺牕深鎖錦成窠傳道六郎承寵多御膳八珍分一半仍教梳髻縮青螺

安得海伏誅後西后無聊不禁光緒初李蓮英以梳

新髻入侍寵幸殊甚內廷遺膳例與內監然蓮英所嗜西后必節食以遺之蓮英直隸河間府人本一無賴子曾以私販硝磺繫縣獄後得脫改業補皮靴是以人呼爲皮硝李云

姑娘賜坐繡屏前傾國傾城一例妍唯爲官家總閒事當筵恨殺李延年

李蓮英有女弟色美光緒辛卯壬辰間年甫及笄尙未適人西后召入寵甚呼爲大姑娘蓮英本欲進之後宮以固恩寵帝自幼體羸不喜漁色所圖竟成畫餅而蓮英恭帝其一實原于此云

秋碧吟廬詩錄

卷一

二十一

后壽既酣屏左右共話咸豐舊事相對悲泣者久之既而袖出一函授西后使觀西后啓視色頓變蓋函中所藏卽咸豐遺詔也東后仍索還焚於燭上曰此紙已無用焚之太佳吾今日亦可以復命先帝於地下矣西后慙憤交并強作感泣態遂罷宴而散無幾西后以餅餌數合進奉東后卽取一二枚食之味殊不適然不至太苦戍刻俄逝矣噫此非中毒而殂歟綺牕深鎖錦成窠傳道六郎承寵多御膳八珍分一半仍教梳髻縮青螺

安得海伏誅後西后無聊不禁光緒初李蓮英以梳

新髻入侍寵幸殊甚內廷遺膳例與內監然蓮英所嗜西后必節食以遺之蓮英直隸河間府人本一無賴子曾以私販硝磺繫縣獄後得脫改業補皮靴是以人呼爲皮硝李云

姑娘賜坐繡屏前傾國傾城一例妍唯爲官家總閒事當筵恨殺李延年

李蓮英有女弟色美光緒辛卯壬辰間年甫及笄尙未適人西后召入寵甚呼爲大姑娘蓮英本欲進之後宮以固恩寵帝自幼體羸不喜漁色所圖竟成畫餅而蓮英恭帝其一實原于此云

御廚漫道進猩脣。依樣連朝一再陳。絕羨何曾飫蒸餅。殘杯冷炙最悲辛。

寇連材宮中日記曰。皇上每食三膳。其饌有數十品。羅列滿案。然離御座稍遠者。半已臭腐。蓋連日以原饌供故也。近御座者。亦大率久熟乾冷。皇上每食不能飽。有時欲令御膳房易一饌品。御膳房必奏明西后。西后輒以儉德責之。故皇上竟不能言。

萬乘天子似孤囚。寂寞瀛臺又值秋。日暮西風吹得急。湖波四面渚蓮愁。

西后久有欲廢光緒之意。戊戌變法之後。殊甚而恐



不飲珍珠沈丹
六龍西幸在

其外逃。遂幽帝於南海瀛臺。南海者大內之離宮。而瀛臺在海之中心。四面皆環以水。一面設板橋。以通出入。西后以腹心。內監十餘人嚴守之。名雖至尊。實則囚虜矣。

神京失守。妾無家。劫火連天。鼓角譁。滿殿濺來。嬌血紫。西華門外走騾車。

拳匪之變。八國聯軍。以七月二十日入京。其翌未明。西后青衣徒跣。泣而出宮。光緒及后皆單袷。隨行至西華門外。乘騾車。珍妃帝所最寵。而西后最惡之。既不及隨駕。乃投井而死。宮人自裁者亦無數。

君臣掩面泣相看。麥豆救飢纔一盤。破驛西風角聲咽。五更布被夢魂寒。

是日薄暮。駕至貫市。帝及西后不食。已一日。民間或獻麥豆。至以手掬食之。須臾而盡。時天漸寒。求臥具不得。村婦以布被進。濯猶未乾。乃擁之而臥。

水邊誰續麗人行。裙屐趁春風日晴。花草雨餘生意滿。疏蜂冷蝶也多情。

燕京素乏林泉之勝。公園尤闕如焉。庚子之後。百度維新。倣泰西之制。於西郊創萬牲園。園之隙地。更闢爲農事試場。比年異物萃植益多。西后屢幸此。極治

游之樂而駐蹕。一夕費七十萬錢。

梨園供奉感殊恩。絲管連宵捧玉尊。莫遣崔徽歌水調。花前容易欲銷魂。

西后頗嗜音。內廷供奉凡十數人。崩後菊部飄零。崔靈芝獨在耳聞。崔聲調悲惋。聞者爲掩泣云。

萬壽山前鵲語悲。千門深鎖夕陽遲。紅愁綠慘傷春淚。灑入王家絕妙辭。

西后生時居頤和園。崩後園亦漸荒廢。近時海甯王靜菴國維有頤和園詞。音節悲涼。殊爲絕唱。

琉璃世界水晶宮。想見阿房氣象雄。例是紛奢亡國早。

義旗昨日下午江東

宣統登極後遽築水晶宮以奉養其嗣母宮在甯壽宮東掘地爲池立水中央凡三層層九間以銅爲棟以玻璃爲牆牆之夾層中置水蓄魚紅鱗空游荇藻參差青翠如畫下層地板亦以玻璃爲之可開闔時或揭起駕小舟達宮外結構異常蓋曠古所無云銅駝荆棘有餘哀陵土未乾鼙鼓催莫向壽皇亭下過夕陽古栢亂鴉回

光緒欲行新政戊戌變法銳意勇決幾有一日千里之勢然滿人大員齊起痛詆之西宮愈專權一律復

右

舊繼此以拳匪之亂國運日不振兩宮崩後未三歲清室遂亡悲夫

龍王驛望峽中西境群山浩然有賦

西風晚捲溼雲晴蕩滌吟懷秋更清廿載五過峽中路四圍亂嶂半知名

題歸去來莊爲小川射山平吉囑用壁間挂幅村瀨栲亭詩韻每首起填陶句

依依墟里煙嫩日照花徑春水一溪青暗泉穿竹聽遶屋樹扶疏晚風吹野徑夏雲峰勢崩一雨涼堪聽杳然天界高白露流幽徑秋月照予懷鶴聲深夜聽

蘭枯柳亦衰。疇昔煙霞徑。冬嶺暝雲低。夜牕風雪聽。

溯釜無溪

涉水幾褰裳。溪路忘紆曲。數里沙岸盡。遂造西山足。石
躍湍勢狂。懸流迸寒玉。溪魚捷欲飛。其下澄潭綠。仄徑
尋熊蹤。密篠森似束。松檜皆十圍。山氣疑噴毒。萬巖轟
破空。岑岑紛在矚。偶見黃葉枝。六月知寒酷。踰嶺趁猿
猱。魚貫呼相續。嵐路礙斜暉。衆峰雲作幙。登頓終日勞。
泉石滌塵俗。安得磨蒼崖。題詩留逸躅。

日落蒼靄深。樹罅一星耿。暝嵐灑人面。慘如窮秋景。夜
宿巖牆下。勝境固已領。疏糲飽我飢。賞詠發深省。萬象

森在前。一與玄虛併。神凝清無寐。露臥宵正永。天近銀
漢低。缺月挂遙嶺。却疑煙蘿中。山鬼行有影。流泉挾風
聲。群響破幽靜。石氣潤於雲。轉怯肌骨冷。

疏星澹已消。曙色浮煙樹。亂嶂歷歷青。大地尙冥霧。峰
頂初日紅。林鴿一聲度。丹厓帶朝霞。巖花裊泣露。迴風
振萬柯。白雲流不住。奔泉響相和。靜中聽韶護。秋意殊
健人。豈乏濟勝具。昨游歷嶮巘。今尋澗邊路。

飛步蹋澗石。兩邊拔列嶂。跳身千仞高。似出青冥上。溪
蹙復呀張。巨巖絕依傍。瀨盡見奔湍。湍斷懸泉壯。泓澄
滙作潭。險奇誰能狀。神物之所都。深碧何滉漾。高寒忽

栗肌濃霧風外颺。終古闕頑陰。日色劇悽愴。轉覺奇趣多。路窮徒惆悵。到茲判仙凡。賈勇誰前向。絕境難久留。劃然發高唱。持此謝山靈。孤懷自超曠。鳥道入雲危。層厓屹如削。絕險捫薜蘿。心目爲駭愕。豁訝峽勢開。巨靈曾鑿鑿。當面大瀑懸。斷虹五彩錯。誰挽天漢水。倒自峰觜落。銀絲紛拂空。飄蕩無所著。深潭承之沸。亂流漲澗壑。餘勢洗厓腰。衝波驚珠躍。凝露擺樹梢。日氣青逾薄。恍踞雪山巔。下界笑炎虐。縱觀償我勞。欣踐林泉約。一嘯倚天風。振衣且盤礴。

諏訪諸士設讌於花岡山紫明閣見招午下渡湖

消受高寒作

赴之留飲移時而歸賦此爲謝併告同游諸子

萬綠圍湖光。午天簇晴靄。長年笑捩舵。撐向鷗波外。地勢接上游。煙水西北最。淳涵天四垂。俯仰胸宇大。石棺湖底安。瓢酒成薄酌。遺聞或荒唐。英雄素姦獍。船腹騰波急。錯疑激湍瀨。涼颺四面吹。岸上遞遙籟。霎時祛煩歎。蘋花秋穠馥。攬勝興容與。澄心遠紛瑳。佳招踐幽期。憶哉金谷會。好山先相迎。清景歷可繪。

林際徑透池。苔滑纔受屐。有亭勢翼然。浩渺眼界闢。俯視飛鳥背。便覺天地窄。披襟笑拍欄。吾懷方暢適。隔岸亂嶂堆。嵐光染衣碧。好風度水來。清氣生兩腋。向晚轉

幽迥疏鐘出遠驛。湖背濕翠流。斷霞魚尾赤。漁翁早收
罾。去帆杳無跡。滿汀戰青蘆。水禽鳴格磔。河朔飲已酣。
仍留賞心客。暝色赴歸雲。湖波萬頃白。
高宴歡未盡。醉後笑上船。澹黃殘照遠。歸艣截清漣。湖
尾山既暝。物象幽可憐。菰葉西風急。莫驚宿鷺眠。落霞
紅褪盡。林麓生蒼煙。峰頂佛燈閃。磬聲隱隱傳。昏黑惜
無月。混茫一氣偏。滾滾疑潮上。遠水長於天。窈眇愜孤
賞。凌虛身欲仙。冷然覺衫薄。露氣涼無邊。落落心懷豁。
塵事都屏捐。怕看魚龍舞。穩吟微扣舷。

宮坂氏招飲旗亭賦謝

雨痕涼盪畫簾波。情到新知樂更多。最是玉纖扶醉處。
燈前譜得竹枝歌。

函山涵琴樓題壁以樓名爲韻得三絕

萬峰過雨後。積翠帶秋嵐。潑眼新楓綺。餘霞澗底涵。
竹氣秋含溼。山光午結陰。倚欄詩思杳。流水韻于琴。
亂雲旋變幻。莽莽四山秋。落葉先成雨。西風颯滿樓。

偶詠似人

少年俠氣未銷淪。知己無多莫愴神。骨相窮餘儘相肖。
蘆中人與雪中人。

輓大野洒竹

豐太

故交凋落一悽然。老木清霜雁後天。回首高樓河朔飲。
分明正在六旬前。言中
青囊餘技擅詞名。十七字令看性情。一代驚才今已矣。
由來短命是聰明。
十五年前始識君。當初意氣共超群。翠樓夜夜笙歌裏。
商略揚州月二分。
訂謬析疑真我師。夙成誰怪盛名馳。鄴侯三萬藏書富。
四壁芸香清晝吹。
新詞黃絹似君稀。醉裏聯吟逸興飛。記得湖邊同步月。
荷香如水夜深歸。

鼓吹正聲舉世欽。遺篇今日忍重吟。絕憐鬪句勝韓孟。
疇昔忘形交共深。
斷煙零雨近殘秋。生死茫茫終古愁。剩見湘南煙水濶。
同舟誰復繼風流。
仰天無奈淚滂沱。石火光中身世過。遙指曼卿仙去處。
芙蓉城闕彩雲多。
青山坏土葬仙才。忍賦招魂向夜臺。髣髴秋香描小影。
一尊酌地菊花開。
痛絕年年涕淚頻。浮生真個易酸辛。幾多知己凋零去。
料識九原重結鄰。

送烏野小徑幸次游山陰

驛路山陰遠。西風憶昔游。關河悲歷劫。天地迥含愁。白鷺城牆古。碧雲湖樹秋。浩吟君亦淚。臨眺怯登樓。

題袁隨園真蹟山水圖用東坡煙江疊嶂圖詩韻

上題七絕一首曰。漠漠輕煙罩半林。涓涓飛瀑瀉遙遙。朱儒然坐石觀流水。不識還山路淺深。蓋集外詩也。

玉立雙峙千仞山。日氣欲午拖紫煙。何來一片暝嵐溼。夾崖樹色青潏然。其下有聲鏘鏘如戛玉。衝破巖竇成懸泉。薄霧隨風彩虹亂。飛湍勢盡歸平川。幽人偶來觀流水。低徊立盡斜照前。巖頭試作蘇門嘯。雲木振盪秋滿天。太史多藝通六法。天機奚得論媿妍。尺幅之中髣

髣託高興。料識疇昔賦歸田。君不見北山移中猿鶴怨。吳儂流落過廿年。長安桂玉塵滿面。空憶故國溪山娟。有時杖頭錢一擲。便在黃公壚上眠。澄清天下志猶壯。何暇五嶽尋真仙。功成身退應快意。枕流漱石修夙緣。乃將斯圖挂堂上。閒來須注莊叟秋水之一篇。

讀燕子箋

俠氣柔情貌共殊。憐才自古屬名姝。酬卿便掃春愁盡。描得聽鶯撲蝶圖。錦箋偷寫斷腸詞。簾外春闌夢醒時。好在因緣都賴汝。可憐燕子亦情癡。

瘦影亭亭暗自傷。何時鸞鏡照新妝。爲情得病寧辭死。
絕似當年杜麗娘。
六師虎豹一朝空。聞道潼關戰血紅。始識文人元有膽。
龍韜容易策奇功。
風雲河北羽書催。玉帳爭推草檄才。翻笑相如諡巴蜀。
行宮忽獻賊頭來。
當初漫怨渺佳期。薄倖蕭郎不自持。細柳營中償業債。
依稀早認夙因奇。
人間豔福見參軍。今夜華筵燭影分。未免行雲猶妬色。
情鍾第一是飛雲。

拍遍紅牙儘斷腸。翩翩才調豈尋常。若教不遇亂離日。
聲價寧輸玉茗堂。
忍把斯才塵土埋。闍兒悔過莫相排。諸公狹量真無謂。
至竟清流是亂階。
離奇結構妙通神。寫上吳綾細字新。錯使君王看不足。
秣陵歌舞劫前春。

讀幽閨記

北來鐵騎忽長驅。城上烏啼王氣徂。元識謝玄能却敵。
翻教董卓議遷都。美人白屋姻緣合。公子綠林心跡孤。
骨肉天涯消息斷。家家零落泣榛蕪。

野哭郵亭彼一時。藥爐繾綣命如絲。三秋鴻雁羈愁苦。
萬里風沙鄉信悲。自許文章堪濟世。仍知天道本無私。
飛揚恰值中興日。金榜題名殊未遲。
拜月亭前一炷香。相思入骨隔參商。閨中花鳥情千種。
劫後關河淚幾行。悄倚繡牀尋舊夢。懶臨明鏡理殘妝。
寧期來日團圓夜。臺上簫聲引鳳凰。

池邊藤園招飲賦似

幽居城市外。門徑有餘清。寒色青松活。夕陰黃葉明。文
章違薄俗。尊酒判真情。記自垂髫日。欽君四海名。

小園卽目

悄倚紗牕怯晚風。秋煙低地乍微濛。階前霜葉紅深淺。
一綫斜陽渲染工。
楓葉翻階秋正衰。傷心却似落花時。西風作意晚來緊。
一種荒寒不耐詩。

答人問近況

齷齪賣文爲活餘。偷閒夜校蠹殘書。從來讀破愧無幾。
畢竟浮生名亦虛。

秋柳篇

玉驄公子路傍戲。折得長條春正翠。時光瞥眼又西風。
忍向章臺重沽醉。衰枝疏葉早凋零。煙愁露慘九秋經。

美人解舞腰逾瘦。詞客鬢邊無故青。憶昨送人江閣夕。
輕絮亂飛新漲碧。勞歌今日唱者誰。孤舟橫岸寒波拍。
無端酒醒淚霑衣。金粉零星六代非。可憐一株憔悴甚。
丁家樓畔故依依。

華燭詞爲次弟良作

梅花丰韻雪精神。百兩迎之恰吉辰。種玉山中笑多事。
鴛鴦牒裏證前因。酒波綠漲合歡杯。佳氣綢繡筵正開。
寧羨秦樓高百尺。吹簫旋引彩鸞來。妙詞好是賦催妝。
孔雀屏圍華燭光。來日紅闈春意開。

海棠花底鳳呼凰

紗帳深垂護夜寒。仙緣無恙訂新歡。芙蓉竝蒂樹連理。
幻出瑤池春色闌。

合香禮全魚水嬉。閨中花鳥度生涯。風流靜淑好相配。
婦是齊眉夫畫眉。

堂上慈萱喜色添。牽羊成禮莫相嫌。賴君願見吾宗盛。
早晚熊羆續鳳占。

牕前綺樹鳥雙栖。香夢纔醒出翠闈。椎髻布裙牀下跪。
換裝好擬伯鸞妻。

北地雪深燈影閒。忍饑夜讀未開顏。劉家兄弟畢婚晚。

怕說當初生理艱。
欣欣便識兩心同。
挾瑟高堂樂不窮。
說與新人須記取。
從來清白是家風。
雙拜問安披繡幃。
一家真樂願無違。
承歡替我老萊戲。
準擬春衣抵彩衣。

歲晚雜詩

旅食每嗟薪水艱。
詩逋文債積如山。
研思徒使精神耗。
終歲難求一日閒。
臘後天寒凍硯池。
悵看午晷坐來移。
忙中得句訝神助。
恰是竹爐茶熟時。

垂老一裘猶御冬。
棲遲例是出門慵。
蘭憔悴荒寒裏。
獨自盤桓靜撫松。
紙牕日短闌無人。
幽鼎旋爲蚓笛頻。
鄴架今年添幾卷。
芸香滿壁未全貧。
可似范家籬角梅。
荒園漸合化瑤臺。
冰魂定自吟邊返。
石帚清詞誦幾回。
鬢華忽與歲華增。
碧海掣鯨嗟未能。
自笑迂儒真面目。
十年苦守一青燈。
真個長安不易居。
數奇贏得只文譽。
一燈如豆竹間碧。
鄰屋何人亦讀書。

閒收亂帙酒杯傾。夜半老烏棲又驚。秃樹檐邊風驟起。
 為誰苦作不平鳴。朔風吹送雁聲酸。衾鐵稜稜夢不安。落月屋梁魂也杳。
 故人黃壤欲招難。朝暮挽鬚頻笑嬉。牀前愛見兩嬌兒。阿孃昨夜寒燈下。
 為汝春衣裁得宜。

秋碧吟廬詩鈔卷一

秋碧吟廬詩鈔卷二

東京 久保得二 天隨

甲寅

元旦

滿鬢春風四十年。窮通過眼付雲煙。詩於象外攄胸臆。
 道自經中尙聖賢。嬌鳳欣添新眷屬。次弟舊臘新娶 名山欲續舊
 因緣。明日將游函山 梅花有個手栽樹。醉倚東牕初日妍。

讀夢樓詩集題其後

此本與香蘇山館詩鈔共為金井秋蘋。雄 舊藏予介
 大野洒竹獲之。但往往有蠹壞處。聊自繕補。讀未半。

束之高閣十年矣。今茲甲寅歲首游函山。閒中得一
閱始畢業。秋蘋逐句施豆加批圈者。十之二三。予更
補之。顧秋蘋墓草既宿。洒竹亦去歲就木。追憶往日
感愴不禁。乃賦十律題其後。末首特爲二人誌哀云。
擲地金聲廿卷詩。寸心定與古人期。枉將袁趙推前輩。
儘遣姚朱稱舊知。道味積年誰敢匹。名場歛跡豈云遲。
太常法曲好相擬。始信洪家月旦宜。
江南才調舊翩翩。走馬長安春正妍。詩酒清狂參白社。
科名容易屬青年。半生閱歷嗟官繫。早歲聰明亦佛緣。
郢唱終然期不朽。何須屑屑羨凌煙。

蓬萊咫尺隔紅霞。萬里相隨博望槎。纔判死生詩作卷。
何妨艱險鬢生華。樓船南海煙濤濶。玉帛中山歲月賒。
長憶風流多勝會。當筵若秀豔於花。

中山貴戚子弟皆習歌舞供奉
王廷其最姣麗者謂之若秀

劫後猶看戰骨橫。夜郎天遠又孤征。風塵易溼青衫淚。
邊徼偏傷白屋情。金馬碧雞關勢隘。蒼山洱水瘴煙平。
三年解郡志初遂。歸興恰逢秋色清。
日對閒鷗澹不言。溶溶新漲碧當門。輞川持戒筍蔬足。
彭澤思歸松菊存。筆下雲煙任揮灑。曲中宮羽細評論。
老來署得西湖長。若許風流終古尊。
長城盡處獨徘徊。苜蓿原頭筍角哀。落日塞垣驅馬去。

高秋幕府鬪詩來。天低大漠陰山隔。地接玉關滄岸開。
行到臯蘭腸更斷。沙場白骨積成堆。
一任霜華兩鬢侵。逃名塵外卸纓簪。無邊秋色浮江漢。
滿目青山閱古今。老境頻年蕭寺粥。薄游疇昔故園心。
倏然斷盡閒煩惱。五夜風傳鐘磬音。

鄂渚琴臺三度游。題襟幾處作淹留。潮生江上魚龍夜。
日落楚天鴻雁秋。風雨對牀吟自慰。蓬桑有志老相酬。
琵琶亭下停撓見。湓浦寒深始欲愁。

了心悟徹本來真。摩詰千秋有替人。燈火詩龕花作佛。
鬢絲禪榻夢經春。葛藤調盡閒持偈。煙水冷然穩寄身。

泯

想得止觀齋裏夕。蒲團枯坐達清晨。
客舍青燈坐夜闌。悄思故友意殊酸。百年似夢醒還早。
一代成名死亦難。仍賸文章醇似酒。絕憐交誼臭如蘭。
孤吟揮淚嗟吁久。忍把牙琴手更彈。

抵

寓樓題壁

寥天緩度上方鐘。倚遍谿樓第幾重。雪意纔消斜日霽。
斷雲補作兩三峰。

寄懷森川竹篔次其近作詩韻

晚日酒消愁倚欄。忽從天末望長安。幾時溪壑春姿轉。
滿地冰霜梅信寒。頻欲逃名詩作累。若逢知己死何難。

嗟吾萍梗空將老。人事蕭條襍被單。

梅屋主人每予投宿。必就索字。率賦一絕。戲似。

纔記姓名如此歟。春蛇秋蚓任紛拏。只緣懶惰故無匹。

垂老慙輸阿買書。

寄三弟暢在長崎。醉後漫吟。語無倫次。唯抒胸臆。

詩以代柬耳。

兄弟五人三處分。鎮西千里最懷君。等閒草長鶯飛候。

一片離愁趁夕曛。

相思兩處淚同霑。分手而今歲月淹。無賴東風乍吹綠。

靡蕪滿地與愁添。

天涯旅食跡迢迢。近日音書太寂寥。聚散從來無定準。

傷心重值可憐宵。

簷花移影月當牕。鄰院歌殘水調腔。憶得去年今夜別。

酒波欲冷剔銀釭。

瓊浦山圍萬戶煙。賺人風月最堪憐。江樓壁上籠紗否。

一自題詩二十年。

空囊橐筆幾居諸。仍愧王門曳我裾。至竟斯才何所用。

無人買賦到相如。

疏籬茅屋寄殘生。敢向天公訴不平。細嚼梅花初夜候。

詩脾悄地有餘清。

風雨聯牀志未酬。宵宵魂夢苦相搜。憐卿丰貌先君似。四海蒼茫一子由。

鳳占慰得北堂萱。昨日次郎新畢婚。爲汝今番擇鸞匹。待他頻舉讀書孫。

燈下沈吟更又移。替將千紙便裁詩。何當裘馬歸來健。恰值紫荆花發時。

黃仲則兩當軒集。予往年頗愛誦之。頃復翻閱一過。率賦七古二首。乃題其後。用集中前後觀潮行

韻。

舉世輕肥重五陵。雅音將絕誰振興。天教才俊出寒素。

有似豐城劍氣騰。彈鋏依人幾處屈。插腳翻覺八荒隘。就中廣陵興最豪。觀潮欲浮九州外。平生慙作寒螿號。浩吟驚見星斗搖。被髮醉中唾壺碎。酒氣噴空虹未消。關門昔日棄繻入。場屋稱屈嗟何及。生不能得萬戶封。傷心和淚千首溼。儘教灑吏笑個儂。未暇名山伴青童。嘔心長吉命偏短。無端一折龍泉鋒。嗚呼世事等遊戲。歌激每使窮鬼避。想君跨鶴返瑤宮。俯視齊煙浮大地。自古高才不遇時。得喪畢竟天只知。我比君壽今躋五。浮生碌碌何處之。

洞庭波兮下木葉。蘭有秀兮湘岸立。風塵中人似君稀。

耿耿胸挾元精入。偶然墮謫下界停。不怪王侯倒屣迎。
晚年攝取幽并氣。酒肆歌成盡商聲。海內何人不心折。
詞鋒自淬百鍊鐵。萬古詩名太白樓。想見白袷潔於雪。
南北馳驅歲月遙。隨處幕中聲價高。遏雲逸響風吹落。
溟渤揚波五嶽搖。閒吟遣悶空朝暮。車聲擘管向何處。
詩卷幸非投溷餘。釣竿未拂珊瑚樹。呵壁問天天亦愁。
墨花飛舞煙雲浮。乾坤賸得神磅礴。俠骨須埋鸚鵡洲。
玉樓縹緲絕消息。千丈虹光消不得。憐看他家趁韻詩。
敗紙慘作死灰色。

仲春雜詩

春陰閣雨晚來濃。釀得嫩寒簾影重。賸見緜梅花數點。
錯疑時節尙窮冬。
笛裏梅花早委塵。月黃昏底暗傷神。從今得意閒桃李。
仍是東風取次春。
吟破夢邊春草生。也知時節近清明。夜來微暖催花雨。
溼透簾衣細有聲。

偶檢筐底獲牧野芝石

修

遺墨七絕一首實係十

六年前予客松城時所贈展玩久之感愴不禁賦
七古一篇聊寓追慕之意予時讀杜集乃用集中
追酬故高蜀州人日見寄詩韻

萬丈少微芒作作芙蓉城闕雲吹落傷心騎鯨已幾年
舊事淒涼宛如昨知君才亞王逸少胸中別開天宇廓
矧是風流冠一時山陰水竹閒領略鬚眉朗映研席間
觴詠興酣慰寂寞怪底白首困微官未聞北海薦一鶚
吾生數奇何復論知己寥落此身存滿腹文章三萬軸
誰憐光焰照乾坤裘馬清狂正年少江湖不怯歲月奔
曾過君鄉辱雅贈却憾題鳳松下門眼前重展龍蛇活
稽首爲酌綠一樽唱盡南無賈島佛梅花影裏賦招魂

春日感懷

貂裘敝盡慣長貧痛絕相憐形影神王粲登樓儘爲客

梁鴻寄食僅安身萍移蓬轉原無據草長鶯飛又一春
朱紫從來非我分依然黃卷日相親
欲捲疏簾故遲依稀春色惱吟思銷魂莫讀江郎賦
驚世須傳白傅詞五夜雄心嗟伏櫪一腔奇氣且銜卮
倦游幾處留陳跡腸斷風流杜牧之
兩鬢霜從鏡裏侵黃衫意氣日銷沈風塵滿眼窮途淚
魂夢多年故國心斜照長亭連柳色歸鴻大澤變春陰
茫茫身世頻回首醉後仍爲慷慨吟
愁裏光陰似擲梭長安桂玉竟如何清時人物功名薄
純古文章涕淚多驛路天遙悲夜笛家江水暖夢漁蓑

仍期花下酒初熟。落落乾坤入浩歌。

江花江草又清明。煙景句留羈客情。隔岸樓臺春似畫。夾街楊柳雨初晴。中年才減吟偏懶。薄倖名存悔轉生。何耐風塵猶溷跡。飄零白袷一身輕。

無爲却憶我生初。夙志蹉跎與世疏。既看榮華等蕉鹿。誰憐刻苦注蟲魚。五陵衣馬本同學。一榻琴書非舊廬。辜負鶯花春似海。江湖滿地奈離居。

晴日烘簾花氣香。鶯啼燕語爲誰忙。唯攄胸臆詩篇富。不爲科名書味長。美酒乘時沾爛醉。老天有意縱清狂。爭如賈誼少年日。托得吳公在洛陽。

猶年少

賣餚天氣憶江南。閒譜新詞感不堪。軟綠欲煙芳草襯。嬌紅試雨小桃酣。寧關世事累千萬。賴有酒徒來兩三。前度縱游猶得意。輕塵一路走春驂。駘蕩韶光難久留。繁華如夢水東流。眼前事局驚蒼狗。悟後情懷托白鷗。遲暮嘯歌聊忤俗。浮生蹤跡孰同儔。黃昏一雨花飛盡。簾影低垂罨畫樓。

四能又街

時事多艱憂思催。唾壺敲碎不停杯。侏儒飽食知何用。傀儡登場算幾回。誤得虛名恐招禍。難逢先進解憐才。卽今翹望調元手。銷盡旄頭甘雨來。

頃有人自海西歸告竹篔以蜀中妓女歌其所作

詞者頗多竹磳乃賦四絕予亦次韻贈之云

重溟望斷海西天。韻事昨憑歸客傳。好是弓衣織成地。曼聲又唱柳屯田。

旗亭本事也無多。想見雙鬟笑倚歌。只怕君家詞句溼。水花風葉奈愁何。

閒譜新聞腔子長。只須唱向水天涼。夜船吹笛瀟瀟雨。慣聽年前儘斷腸。

絕愛新詞韻最嬌。夢魂偏趁海潮遙。紅牙拍遍青樓妓。

銀燭看花萬里橋。

結放翁句

反游仙十首

四月十一日 皇太后陛下崩諡曰昭憲

鸞車輾過五雲邊。遙指崑崙最上巔。容易鮫人珠淚盡。鼎湖龍去未三年。

閶闔宵開引爽靈。塵寰安得算千齡。翻落琪花步虛路。霞衣霓佩太伶俜。

飛步中天躡彩雲。離迷倒景曙光分。五陵萬古濛濛翠。下瞰人間蟻垤紛。

玉宇渺茫仙路賒。銀河昔說客浮槎。誰知下界傷心極。琪樹無風又落花。

愁絕麻姑霜鬢新。眼看東海復揚塵。罡風吹入桃花黑。從是蓬山慘不春。

萬丈芙蓉倒影浮。松風吹斷氣如秋。凌波小轡杳無跡。
閒却門前清淺流。海天空濶伏魚龍。隔水青蒼暝色濃。何日重傳韶護響。
夜煙圍住羽衣松。雲背飈輪一路安。嶽神相送碧霄端。崑岡曾住劫餘火。
不是長生太乙壇。瑤闕巍巍碧霧遙。泠泠仙樂引飛輶。天衢夜色冷於水。
月魄星魂剗地消。瓊魂昨日悄乘風。鸞背霞光看欲空。螻蟻也悲塵土底。
女媧賸得補天功。

擬元人懷古十臺詩

醉擁西施日宴娛。秋風一夕動高梧。中原臨會禍機露。
亂世貪功霸略麤。想見寢宮驚越寇。仍聞樂府唱吳趨。
江心髣髴靈胥怒。十丈潮頭白馬驅。姑蘇臺
雄風臺上拂衣寒。始信三休登陟難。鼎重王廷非力取。
壁埋祖廟是爭端。故宮花住嬌魂瘦。晚岫霞分獵火殘。
誰使君王終餓死。谿邊荒塚葉聲乾。章華臺
河山舊國晚煙中。隴樹蒼茫落照紅。卅載經營期報復。
千金容易致豪雄。薊丘長愴風雲色。濟上忽虧征戰功。
陵土難埋無限恨。霸圖悵絕一朝空。黃金臺

宋玉宅殘秋草黃。楚宮遺跡更茫茫。神仙寧耐銜冤久。
雲雨錯疑牽恨長。郢客從來矜和寡。騷人底事抵才狂。
竹枝聲咽啼猿苦。十二峰前日斷腸。

朝陽臺

高歌快意古來稀。臺上大風雲亦飛。社稷寧關豺虎亂。
衣冠始見帝王威。酒徒絕代肺腸在。游子千年魂魄歸。
回首傷懷思猛士。祇應記得白登圍。

歌風臺

黃樓十丈據遺基。黯慘風煙泗水湄。儘有興亡關氣運。
誰圖恩怨變安危。江東子弟傷新鬼。垓下頭顱報舊知。
賸見臺南山色翠。後來閒管別離悲。

戲馬臺

長樂門摧騰殺聲。彝倫變劇事堪驚。佳兵四海煩勞甚。

久病六宮巫蠱成。讒間逾多楚無極。逋逃又異晉申生。
壺關請與田郎夢。纔盡追思骨肉情。

望思臺

漳水東流去不回。幾多宮觀劫餘灰。終生權略三分業。
曠古文章七子才。墓表題名欺後世。帳前奏伎引餘哀。
依稀疑塚亦荒草。秋老西陵風雨來。

銅雀臺

危檻重檐霄漢間。登臨曠望淚潸潸。北來頻歎鼓聲急。
南渡偏悲王氣閒。畫舫煙波兩江水。斜陽金碧六朝山。
留題賸得青蓮句。萬古傷心鳳不還。

鳳凰臺

亂餘創業禁紛奢。何暇凌歊玩物華。殲寇大功移晉祚。
斬蛇異兆又劉家。篋中徒貢嶺南布。露底欲啼秦地花。

歌舞三千誣亦甚。荒臺灑酒夕陽斜。

凌歊臺

蔣劍人嘯古堂集中有續十臺懷古詩予亦倣顰

趙瑟罷彈秦缶催登壇叱咤疾於雷若非夾谷幸無事

亦是武關愁不回三晉風雲何末運一時將相盡雄才

可憐規諫身先死免聽長平戰鬼哀

會盟臺

驚魂七日雪中圍休說華夷服主威欲與秦皇爭遠略

翻輸齊虜識危機黃沙始誘狂胡寇青史猶疑祕計非

畢竟和親多恨事琵琶馬上送明妃

白登臺

富春山色碧嵯峨七里灘頭酌酒過一例功名笑卿相

孤高心跡託煙波祠堂最重仲淹記竹石偏傷臯羽歌

萬古層臺想精爽乾坤清氣此間多

子陵臺

浮雲西北一回頭地勢荆襄據上游早日清流逃黨禍

幾年虛譽鎮雄州寓公無奈廁中泣孽子果貽泉下憂

輸與秦川豪貴客關山戎馬賦登樓

呼鷹臺

築室徐方曾幾時風懷且與乃翁期文章夙識五官將

骨肉唯羞七步詩烏鵲南飛既無地旌旗東下漫勞師

廣陵日斷波濤險鼓角重城壯志悲

賦詩臺

日射觚稜九殿高臨軒笑著碧紗袍神州久歎衣冠盡

羯狗寧關父老勞別殿春酣紅芍藥深宮夜倚白櫻桃

枉教魏武無顏色添得華林氣更豪

冰井臺

六朝金粉欲銷魂。形勝猶思王氣存。老賸天威賊難犯。
生爲餓鬼佛無恩。青山幾閱刀兵劫。香刹昔棲龍象尊。
處處寢陵花落盡。城南簫鼓度晨昏。

雨花臺

楊花飛盡李花榮。歷歷興亡萬感生。鳳舸龍舟冠終古。
春蘭秋菊儘多情。中原鼓角兵戈早。南國江山社稷輕。
臺畔去來唯夜月。帝魂汚血慘無聲。

吳公臺

當初父老苦留君。能拯危亡非撫軍。三輔煙塵迷日月。
六師貔虎壯風雲。錦城駐蹕畏途隔。玉璽移宮眞性分。
地關天開未無憾。干戈河北更紛紛。

靈武臺

飄零唯著一袈裟。紅篋發緘雙淚斜。北極朝廷終易主。

南天瘴癘獨無家。淨因儘賸眞龍跡。末路何須正學嗟。
浩劫纔銷迎老佛。誰憐四十閱年華。

禮斗臺

玉川紀游

堠樹青團日影幽。迢迢官道傍清流。草風沙雨涼仍溼。
纔出都門別有秋。

微涼吹入葛衫輕。古道羸車緩緩行。一雨灑然人肺淨。
叢祠喬木亂蟬鳴。

何來秋意捲簾風。煙樹雲林曉色中。隱隱疏鐘遠於夢。
渡江飛雨乍冥濛。

絕似江南煙水鄉。扁舟載酒棹歌長。一汀秋色無人管。

紫蓼青蒲帶雨涼。

煙雨霏微似暮春。中流打槳鷺鷥馴。等閒此水清芬極。
欲濯冠纓無一塵。未點

銀梭閃閃出波飛。秋入蓼花魚正肥。細雨斜過一篷外。
綠嵐溼盡釣人衣。

露滴蘆花秋滿汀。沙禽戛戛靜中聽。斷雲斂雨風吹散。
拖得遙山一半青。

可人涼意雨晴初。石瀨涓涓玉不如。記得年時故江夢。
桃花春水釣香魚。

素鱗潑潑上漁罾。膾劈銀絲酒味增。剛被江風吹醉醒。

詩懷清似玉壺冰。

節近蓴鱸愁乍催。茫茫身世悵低徊。何時張翰倦游後。
好向家江歸去來。

讀滄桑豔傳奇

三五盈盈粉墨嬌。登場當日記魂銷。前身合是蘇臺柳。
閒向春風鬪舞腰。

悵絕香閨綺夢殘。遙天一瞥送離鸞。塵生京兆畫眉筆。
又望黃衫作俠難。

纔來階下徑迴車。祖法清嚴勝漢家。矧是君王宵旰日。
紛紛蟻賊鼓聲譁。

枉教夫婿覓封侯。豔舞嬌歌轉眼休。底事巫雲吹散急。
孤衾偏夢玉關秋。淒涼舊禁日遲遲。身墮泥犁愁不支。凝碧池頭管絃起。
啼紅怨翠鎖雙眉。情關兒女竟難除。昨得園中乃父書。縞素六軍來捲地。
秦廷錯認哭包胥。亂餘邂逅夙因奇。滿日滄桑總不知。且喜明珠還合浦。
將軍一笑破關時。衝冠一怒爲紅顏。斷案真成重似山。却幣堪欽吳祭酒。
千秋詩史不能刪。

廿載君恩海樣深。依依昔夢苦相尋。黃紿枉斷紅塵絆。
直抵班姬白悼心。

綺才畢竟爲多情。應悔青春浪獲名。仍賸舞餘詞一卷。
鶯花身世感三生。

洞霄宮裏幾經年。回首悲歡一惘然。昨日侯家花姊妹。
臨淮老妓更堪憐。

吳梅村臨淮老妓行箋注冬兒與陳圓同爲田宏遇所蓄伎後歸劉澤清

七澤三湘風鶴秋。欖槍落地陣雲愁。虎狼心性竟難改。
不是深宮同夢謀。

殉國婁妃一樣哀。驚鴻照影獨低徊。西風吹皺寒波碧。
閒煞芙蓉並蒂開。

霞帔星冠第幾仙。蕊珠宮闕五雲邊。絕憐故國神游日。
憶到紅羊歷劫前。
引商刻羽繼梅村。歷歷興亡仔細論。莫向滇池歌此曲。
桃榔花下易銷魂。

讀朱淑真斷腸詞

繡餘拈句麗於春。無限幽愁也夙因。千古才情竟爲累。
錢塘蘇小是前身。
鎖日寒閨珠淚零。綺才應是瘦伶俜。風流孽債償難得。
前有文姬後小青。
依依別恨記魂銷。錦樣才華玉樣嬌。獨唱獨酬聽和雨。

落花時節夜迢迢。

千秋怨耦苦尋思。愁病相仍祇自知。怯顧風前花小影。
海棠亭畔夢醒時。
春燈花市夜悠悠。昨夢商量一段愁。祇是風情酷相似。
何須刊去柳梢頭。
妙詞唱罷坐宵分。閒捻名香月下焚。千古沈冤總難雪。
唯將薄命倍憐君。

山陰道歌

甲寅七月將游山陰發輓之前一夕醉中放歌併似
同游結城蓄堂琢遲塚麗水金予時讀朱竹垞曝書

亭詩集方畢乃用集中同題短古詩韻

明發乘秋晴。三上山陰道。今宵醉裏翻成悲。前度鴻爪
檢詩草。歲月何迢迢。美人天末遙。身生仍濩落。愁來如
黯潮。年少慣行千里路。西風立盡蓼川渡。水明樓古詩
碣殘。玄武洞深雲氣暮。雙槳畫橋邊。新詩譜采蓮。吳孃
工清唱。勸我酒如川。青山應識詩人面。重來華髮悄自
憐。斷魚溪。大山寺。爾時探奇印屐齒。獨憾斯行不及此。
盍拋塵累游太始。長歌天碧夜如水。

車中偶得七首

斷崖喬樹晚蟬吟。峽口天低暝色陰。雨氣挾秋涼滿地。

詞

掃山道中

芙蓉咫尺亂雲深。

鐵橋輪響度長江。夢後羈愁借酒降。燈火三更經幾驛。
夜涼如水灑車牕。

木末樓臺曉靄重。留題蕭寺記前蹤。一湖澄碧開明鏡。
隔水何山潑黛濃。

東山樹色翠模糊。河漢方低澹欲無。露氣曉浮秋似水。
幾枝塔影繪西都。

曙色纔勻宿霧披。淡洲當面翠鬢欹。千秋絕唱贖陳跡。
一角青山歌聖祠。

亂山北走勢崢嶸。處處炊煙颺曉晴。翠浪滿田風路潤。

懸空白鷺一城明。
車行遇險太遲遲。
脚下湍聲棧道危。
喬木流雲午初霽。
依依山色秀於詩。

竹田城懷古

臥虎城頭落照低。
蕭條故壘有餘悽。
一時文物傳絃誦。
兩國江山入鼓鼙。
自古讒諛累名士。
于今伏臘泣遺黎。
倚筇立盡祠堂畔。
秋草連天牧馬嘶。

青溪書院

在宿南驛池田草庵講學處

遺容儼見鶴精神。
天上少微芒尙新。
滿腹文章經史富。
終生省察性情真。
青山萬古宜居易。
白屋三間不辱身。

景仰嗟吾空隔世。
程門立雪了無因。

城崎雜詩十首

樓閣高低簇一衢。
四圍積翠劃仙區。
別看點染化工妙。
髣髴煙江疊嶂圖。
孤雲出岫鳥飛還。
倚遍高樓吟思閒。
盡日相看不相厭。
一堆紫翠是東山。
罨畫樓臺嵐氣晴。
溫泉水滑似華清。
浴餘待月倚欄角。
秋白風簾搖處生。
滿街燈火入新秋。
薄夜歌聲涼欲流。
捲盡珠簾天似水。
輕煙澹粉幾家樓。

孤忠慷慨歎離群。一死從容報故君。碧血有痕苔滿地。何人醉到二郎墳。

平盛嗣墳

棕鞋桐帽想高風。妙句流傳奪化工。落木空山秋日淨。半間茅屋祭蕉翁。

芭蕉堂

潮到天妃廟下回。一灣秋色夕陽催。蘋花香散西風急。盪槳漁娃去又來。

樂樂浦

嫩涼吹上白羅衣。露滴松梢月色微。燈火孤龕藥師佛。姊前妹後進香歸。

藥師堂

樓廢碑殘草似煙。曾游回首跡茫然。江心依舊涵明月。不泝流光二十年。

水明樓址

涼風吹度一江平。渺渺長天露氣橫。松火蘆間影明滅。夜深猶聽打魚聲。

圓山川

竹濱海樓卽日

海嶠雲開雨脚收。長風簸水碧悠悠。一帆秋色斜陽盡。目斷天邊鞞鞞州。

晚航海經津居山港溯蓼川夜半還城崎

陽烏浴巨溟。霞綺雙目眩。何來暝色迷。物象眼前變。浩渺欲無邊。洲渚腥煙遍。初月看易失。天昏海如靛。帆勢挾風高。我舟迅於電。恍從鼉背過。滿篷銀潮濺。漁燈萬點紅。閃閃波間見。扣舷發微吟。心賞方眷眷。夜深海口

迴長川靜拖練魚龍眠不驚露氣浮潭面

大乘寺觀圓山應舉畫

畫史天才獨感恩方弱齡老來一枝筆寫遍幾間屏層閣滄波白寒松晚靄青始知輕巧外萬古足儀刑

玄武洞

洞口神鷗護鴻濛元氣凝中開如厦屋石柱磨六稜上自藻井下牆壁壓頭幾尺危欲崩巧成龜文何齊整別戶虛明射硤礚這裏堪設千人座几牀縱橫皆可凭便覺窈窕乾坤別石函素書披未曾冷風颯颯起檐角飛瀑灑然如碎冰巖溜滴瀝池水潞鬚眉可鑑寒更澄一

漚

曉

經栗翁柴野栗山賞萬口爭嗟稱村叟笑迎客饒舌心竊矜憶

昔大門岬頭遠探勝岬在筑前芥屋距福岡西六里予嘗一游岬下亦有玄武洞其深不可測駕舟而入者數百步而止蛟宮咫

尺神飛騰個是玄海怒濤之所鑿欲寫怪詭嗟未能乃

如此洞蜂房蟹穴耳胡爲歛然聲價增山水待人聊復

爾顯晦有命寧相凌浩歌揮筇試叩石驚聞磬韻鏗然

鷹詩成不敢題巖壁恐爲白茅老君青衣童子所怨憎

溫泉寺

磴道層層埋碧苔空王殿古倚崔嵬一聲疏磬韻林樾日落諸天秋色來

向陽樓與城崎諸士飲

敲碎唾壺歌莫哀。佳人青眼爲吾開。江湖滿地壯游舊。
絲竹今宵豪興催。故向瓊筵稱小戶。漫題綺語愧麤才。
燭華搖處釵光閃。霎地新涼入座來。

戲題校書俊兒扇頭二霎

樓上歌殘燭影愁。眼波肌雪最宜秋。酒醒無奈明朝別。
溝水東西隨意流。

天橋十首

江涵秋影夕陽低。渡口煙松一望迷。欲問前游繫船處。
依依鷗鷺水東西。
輕舟短棹泛中流。人影都如鏡面浮。陣陣水風涼不定。
放

颯然吹入萬松秋。

紫煙峰仄徑盤迴。秀絕眼前圖畫開。十里疏松青未了。
隔江嵐翠忽飛來。

煙外敲殘何寺鐘。海門咫尺水雲重。驚看龍氣騰騰黑。
雨挾潮聲捲亂松。

獵獵風蒲帶雨聲。短篷半揭看潮生。澄波乍蘸長天碧。
一片飛虹閃晚晴。

風捲溼雲涼滿汀。白蘋香裏畫橈停。郭熙平遠斜陽襯。
湖尾山從雨後青。

斷霞紅漾疊清漪。剛是風來水面時。涼入歌腔愁縹緲。

漁娃晚唱竹枝詞。

看從天際送歸帆。暝色江樓晚日銜。快受青蘆風四面。潮光綠上酒人衫。

雨霽江天秋氣饒。文殊閣下碧迢迢。晚來鐘鼓轟於浪。驚起魚龍影動搖。

散髮凌滄二十年。煙波無恙了前緣。燈簾酒閣依稀是。聽水聽風今夜眠。

宮津諸士招飲大張妓樂醉中率賦

紫煙如燼焚絳蠟。柔喉脆管聲聲合。紅妝相顧粉光勻。妙曲新陳試轉蹈。纖腰徐擗蓮步搖。香風忽從袖邊吹。

移

幾個飛燕齊赴節。玉釵微顫影差池。笛聲入破罷清唱。酒酣漏遲隊初放。尊前無客不斷腸。餘音猶繞杏梁上。巫峽雲殘魂夢牽。滿衫露氣月娟娟。陌頭歸來夜如水。游童明日拾花鈿。

舟下保津川至嵐峽

蛟鼉走馮夷怒。湍勢劈峽乍奔注。亂流捲起萬壑雷。飛沫潑作半天霧。輕舟一棹箭離弦。飄搖颺空不暫住。豹躍虎踞各鬪奇。巨巖闖水紛錯互。漩渦急與舟相爭。舵師巧避如脫兔。左旋右折擊楫頻。百忙之中無一誤。群山却走真轉瞬。嵐光雲影成別趣。曩見宕峰湧面前。倏

忽相失勞指顧。傍流層厓長綠苔。日午巖花猶裊露。絕羨樵蘇占翠微。兩三茅屋隔煙樹。西人休誇灑瀨奇。如馬如象亦無數。回首上游經過跡。巒氣蒼茫疑薄暮。須臾山開水漸平。長橋百尺虹影度。詩成恰是棄舟時。恨無青蓮妙筆驚人句。

桃山陵

形勝豈輸金粟堆。于今弓劍有餘哀。微臣草莽沾餘澤。敢擬昭陵一慟回。

寄次弟在青島乃代其婦作

碧紗低貼綺牕前。昨夢三軍奏凱旋。敢向江頭濺愁淚。

隨潮或怕到君邊。

萬里天清秋正闌。滿衫風露不堪寒。南樓今夜好明月。想得征人橫槊看。

月中烏鵲乍驚秋。消受西牕一夜愁。賺得夢魂飛渡易。連天惡浪是膠州。

十月十七日與好文會諸子散策郊外至鶴見驛
小飲花月園賽總持寺歸途過巖崎氏高繩別墅
漫吟紀游得絕句十二首

野田似罽水縱橫。潑眼秋光晨出城。詩思杳然與天淨。稻香時節愛新晴。

竹緯松經嵐氣涼。尋幽偶過古僧房。雞聲欲午秋山下。
野店人稀飯正香。偏憐游屐踏苔痕。林下無風葉自翻。七種花凋菊開未。
孤飛黃蝶瘦于魂。西風吹急雁南飛。節物催人近授衣。杳杳鄉山殘照外。
黃花白髮幾時歸。化城舊在雪天陲。今見給孤園裏移。記得劫前曾禮佛。
上方鐘度雨花時。梅檀香細磬聲添。翻悔浮生歲月淹。聽法欲醒塵土夢。
遠公壇上讀楞嚴。

幽風圖裏試吟游。社鼓喧闐晚日幽。桑柘影斜家遠近。
稻雲黃繡滿畦秋。曲徑短籬三兩家。紅綃一抹遠林霞。他時我亦開荒住。
桑竹成陰澗水斜。鴨嘴船迴潮上初。煙橫極浦夕陽虛。閒中未免殺機在。
停杖江頭笑釣魚。邱壑高低路幾盤。平泉花木任人看。巖扉雲鎖龍吟窟。
想得松聲半夜寒。巖崎氏家廟在園中
最幽處匾曰龍吟窟潤色風光唯有詩。此間雅集定何時。庾家舊有小園賦。
仍是寂寥滋味宜。

歸鴉忽趁隔林鐘。墟落蒼煙暝色封。回首夕陽紅盡處。
秋天繪出紫芙蓉。

輓丸山松廬

正彥

天道與善人。斯語本非妄。却傷同社賢。胡爲俄凋喪。君
性淑絕群。踐履必忠亮。君學實濟世。志操自高尚。藹然
古君子。禮容克謙讓。幕中教貔貅。君官陸軍教授四海負聲望。尊
王與敬神。立言非孟浪。心血瀝無餘。著書重獨創。矧乃
詞藻新。逸興神和暢。珠玉盈錦囊。萬象愜心匠。憶昨初
締交。疑義互諮訪。能容禰衡狂。有似謝安量。函山曾聯
展。玉川共浮舫。雞黍來往頻。翦燭相酬唱。臥病忽三旬。

命也不可禳。遙指玉樓高。騎鶴青冥上。窮秋百草枯。霜
氣瀾清曠。夜月臨靈牀。陰風捲總帳。珠髯儼如仙。疇昔
瞻奇相。驀然判幽明。中心悽以愴。

後圓圓曲

吳梅村圓圓曲初成。吳三桂一見恐其傷聲名。使人
急齎重幣。往求刪去。梅村卻之不許。顧三桂爲亂實
在梅村歿後二年。若使梅村見延陵終始。必當續成
一大篇也。後人傳圓圓者。概以梅村詩爲本。如陸雲
士。敘其爲闖賊掠去之事。鋪張甚力。而入滇以後。却
從闕略。鈕玉樵較詳悉。而不審其死近時。丁傳靖有

圓圓傳輯補雜引諸書考据頗精按順治中三桂進
爵雲南王乃據桂王五華山故宮為藩府增崇侈麗
圓圓亦驕貴無比因將正妃位固辭而止三桂乃別
娶其婦性甚妬悍群姬之進幸者輒殺之唯圓圓順
適其意獨居別院絕不相排軋親如姊妹久之三桂
潛蓄異志圓圓察其微以齒暮色衰請為女道士退
處洞霄宮三桂訓練之暇每來過清談竟日而還康
熙癸丑三桂造逆戊午歿於衡州辛酉雲南城破圓
圓自赴蓮花池而死即葬池傍滇中今傳商山鸞影
一卷載圓圓降鸞之詩道光中阮賜卿從其父雲臺

刻者有

陸鴻印

援閣
坊
法
法
法

游滇曾親弔其墓作後圓圓曲云嗟乎圓圓半生與
夏姬蕭后相類殆無足言者唯其末毅然出於一死
潔身全節其人始可傳也賜卿之詩予未及見之今
詠其事竊擬繼梅村續貂之譏固不遑顧念也

萬頃滇池煙水長五華山色鬱蒼蒼碧雞金馬舊荒服
鐵券丹書異姓王南界交搗拓封土龍盤虎踞稱天府
瀘水初清瘴霧消鬼方灑遍洗兵雨樓閣玲瓏紫靄生
紅酣翠鞞媚新晴驚見鄴都加壯麗更修郿塢費經營
殿上笙歌公讌日圓圓才貌故無匹曾經喪亂慰餘生
夙自煙花憐淑質紅粉青蛾臉暈霞迴風一曲舞腰斜

訂佳緣

不自知

碑煙

長成

依然傾國好顏色。絕似館娃宮裏花。娘子馳名承盛意。
專房當日亞坤位。章臺楊柳愧前生。故劍枉停椒殿議。
兩宮無忤笑相邀。幸免上陽歎寂寥。南苑春酣宜鬪草。
西樓月轉共吹簫。別院燭殘宵正永。龍闈侍寢漏聲靜。
却促君王作早朝。景陽鐘斷曙光冷。聞道吳門殺氣昏。
句欄姊妹幾人存。自從錯受主恩重。廿載深宮夢有痕。
斯生悔被鉛華誤。世味甘酸容易悟。捐棄非關團扇詞。
淒涼絕勝長門賦。從來孽海捲狂波。慧業難償歲月磨。
象牀犀枕非吾戀。銅鼎丹爐願更多。冠帔洗妝俄入道。
除名代籍收蹤早。黃葉山中泉石清。洞霄宮裏紅顏老。

關塞里

盡日松風萬壑哀。焚香禮斗且徘徊。每遭曠騎傳呼到。
例是長楊射獵回。廢興慣見當場劇。野性終教其族赤。
竊識君王蓄異圖。婁妃極諫苦相惜。禍福眼前多所思。
碧桃花落日遲遲。一聲疏磬洞天寂。悶對瑤牕幾斂眉。
果然雄帥為狂賊。蟻聚蜂屯兵氣黑。擬自長沙絕洞庭。
山河破碎日無色。潦草風雲百戰餘。安危變局計何疏。
赭袍玉帶圓壇頂。晚節翻傷夙志虛。豺狼勢蹙無由起。
鶴唳半宵驚不已。淮上昨傳黥布奔。湖陰今報王敦死。
六師電掃入荒陬。凱唱聲高稜氣收。旣愁銅雀灰塵冷。
又見姑蘇麋鹿游。蒼梧雲黯誰相弔。白骨青燐群鬼嘯。

館娃

秋碧八行盧詩少

卷二

分年二十七

例編

十一月初四拜觀新宿御苑得五絕十首

門徑明簞痕。秋氣淨於水。寒花無媚容。開在仙苑裏。
竹外流泉響。紅楓覆遠陂。苔深留屐跡。小立倚疏籬。
溫窖世無雙。玻璃疑玉殿。蕉黃採滿籃。日上君王膳。
叢蘭九畹滋。風裏香輕重。淺碧繪疏秋。絕憐南島種。
琪樹何玲瓏。嵐翠饒爽氣。林下午日微。巖腰雲生未。
步到石橋南。澗邊老樹參。澄潭欲無底。萬象和秋涵。
琤琤到耳清。幽泉石澗瀉。中有韶護音。人間誰聽者。
楓葉下寒波。荇絲引魚去。秋光入畫圖。却憶江南路。
明漪鑑吾心。瀟洒出塵想。恍立淇澳前。萬竹遞清響。

新

半日作清游。微吟歸得得。蒼然晚景微。林際煙如織。

土肥鶚軒

慶藏

招飲次見似詩韻賦謝

欣然值遇豈無緣。仍賸奇愁欲問天。直以性情彈古調。
敢期名字媿群賢。浮生歌哭綠尊酒。綺讌風流紅蠟煙。
百尺樓頭擲杯笑。浩吟更向月明前。
盍簪重得了心緣。節物何關殘臘天。傲骨誰憐今有我。
高歌且擬古之賢。嚴城急柝寒敲月。老木清霜夜拖煙。
痛飲忘形漏將盡。頽唐人影一尊前。

次中村背水

彌六

華甲自壽詩韻却呈

緬想風雲馳騫秋。寧堪遺劍刻舟求。英才夙足三冬學。

老境翻嗤一壑謀。富貴慙尋槐國夢。精誠莫比杞人憂。
尊前駐得朱顏好。采藥何須到祖洲。

香山樓酒間賦似上村賣劍才六次其書感韻

相逢感舊又傷今。世上悠悠行路心。生怕新寒吹酒醒。
燈青劍白夜堂深。例向尊前意氣真。高樓銀燭夜留賓。任他天地同荆棘。
別有醉鄉容此身。

讀詩命樓集題其後疊韻

翻覆人情自古今。仍餘一片濟時心。酒酣斫地歌長短。
骯髒方知閱歷深。

憶殺風流賀季真。侯門昨日共迎賓。隣君早厭長安市。
去作鑑湖歸隱身。

重似賣劍三疊韻

半生偃蹇到如今。歷劫何關萬古心。憶到繩牀風雨夜。
依依形影一燈深。隨緣一鉢見天真。萬法何由判主賓。石火光中過百歲。
浮生漫累有情身。

四疊韻

一彈指頃去來今。句坡明鏡皎看塵外心。澗水急流還幾
曲。孤雲徐曳洞天深。

閒臥煙蘿守我真。禪牕夜夜月爲賓。長空不礙雲飛疾。修到空門自在身。

喜次弟至

君行昨何處。青島莽濤寒。王事勞無厭。男兒死豈難。一朝烽火息。絕海簡書寬。骨肉欣相見。莫教杯酒乾。

木村梧牕

助

招飲同菖水賦

胸無城府兩心舒。觴詠今宵識面初。偏愧鬚眉窮後老。莫嫌禮法醉中疏。譚詩須翦三條燭。嗜古曾披二酉書。半夜霰聲鴛瓦碎。峭寒如水紙牕虛。

歲晚得小閒。理案上書帙。詩詞凡十部。卽係今年

所施圈過日各題一絕排悶

千秋靖節儘同心。至味都從字外尋。底事錢郎漫高步。

雕章琢句變徽音。

韋蘇州集

樂府青蓮須共馳。橋霜店月又新奇。檀郎千古被人誤。

枉道金筌側豔詞。

溫飛卿集

絕愛麗辭聲韻諧。楚騷遺意亦清佳。終生不作頽唐態。

白髮烏闌賦繡鞋。

薩天錫雁門集

碧牕深鎖病厭厭。燕妬鶯猜愁更添。絮語難終格逾下。

漫將貌似續香奩。

王次回疑雨集

黑江秋盡咽悲笳。雪硯冰簾歸思賒。頭白可憐詩作卷。

廿年唯慣賦龍沙

吳漢槎秋笈集

文章經術盛名齊。詩與王查異町畦。根柢深兼才力厚。

盤空硬語憶昌黎

朱彝尊曝書亭集

欲從教外悟真傳。老境長齋詩亦禪。妙句果然歸見性。

佛前燈照意珠圓

王禹卿夢樓詩集

江西末派日紛紛。破碎尖酸何足云。博奧殫來存古調。

玉溪後勁有夫君

王壬秋湘綺樓詩集

停權爭聽牙版長。湖山住得舊清狂。張王周李聯鑣處。

絕似詩家有晚唐

仇仁父無絃琴譜

綺愁譜入莫愁歌。紅衲裹將珠淚多。浙派遺聲嫌熟套。

新腔好續郭頻伽

蔣劍人芬陀利室詞集

水仙花詞

移向磁盆花韻新。檀心玉面淨無塵。人間奈此斷腸種。

擬寫清詞續洛神

絕代風神儼素娥。梅兄礬弟竟如何。牀前弄影偏輕裊。

一脈寒香古意多

四壁清寒夜讀天。悄從燈下看幽妍。黃冠翠帔淨因在。

憶殺神仙謝自然

幻出風流瀟灑姿。眼前春淺嫩寒時。紅嫣紫姹既相厭。

一片冰心與我宜

次上村賣劍歲晚書懷韻

醉鬢風亂欺蓬茅。偃臥空索安樂巢。蹇予窮中觀六爻。
平昔懶學僧打包。落葉添竈煙出庖。貧苦未免妻孥嘲。
瑟居孤陋生計拋。安得遭遇如劉苞。有時閒把楞嚴抄。
繩牀三尺移岸坳。既知衆俗同斗筲。愁見出山泉水淆。
黃衫當日多款交。欲結豪右安三嶠。縱有絃誦開西膠。
曰忠曰孝誰能教。吾生到此嗟繫匏。燈前慷慨看冰蛟。
夜深忽聽霜鐘敲。斜月一片懸梅梢。

秋碧吟廬詩鈔卷二

秋碧吟廬詩鈔卷三

東京 久保得二 天隨

乙卯

新春函山客中同上村賣劍賦限韻得二十首
出門先一笑。梅柳解迎人。隨處春迴早。溪山發興新。
澗道車行緩。峰巒疊似屏。濛濛雲木合。一綫夕陽青。
倚欄詩思淨。一境不留埃。松頂片雲白。錯疑孤鶴來。
嫩日催春霽。微風拂曉煙。禽聲韻于磬。竹樹靜而妍。
危巖束奔瀨。絕壁舞奇松。青靄拖當面。高低幾十峰。
公主避寒地。樵蘇仰寵光。初梅一枝白。穿竹出宮牆。

溪樓成小住。欲著薜蘿衣。潭水瑩於鑑。孤禽照影飛。
嘯倚碧欄干。飛嵐紛似雨。壁間看舊題。廿載籠紗古。
溪明日未沈。樹靜風初定。莫是拾詩人。欵巾過前徑。
牕前風竹戰。酒醒覺寒添。四壁燈痕澹。半宵仍苦吟。
悄立高寒底。瀑殘蒼壁間。重來須避暑。終日弄潺湲。
雪意峽天暗。林梢雲不流。畫中山遠近。數點墨痕留。
湍激石移脚。崖頽松露根。閒雲引人去。步步近仙源。
澗戶晝蕭森。坐看歸鳥度。前溪誰采薪。斧響振深樹。
溪枯橋脚細。木落店身寒。彩翠山生面。晚晴霞綺殘。
飛湍溪勢傾。起伏皆奇石。硫氣帶餘腥。依稀蛇骨白。

無月又黃昏。寒生空谷裏。野梅纔一株。疏影涵流水。
暗泉聲正凍。霜氣峽間低。月出群峰寂。孤猿隔澗啼。
雲山訪仙跡。澗水滌塵情。茲境幽無限。雀鴉還不聲。
勝境留零句。吾才拙可慙。詩囊敢矜重。一半是煙嵐。

腰越本龍寺訪片野晃陽玄貞賦似

半牕月作佛前燈。孤磬聲幽夜色澄。憐見梅花殘雪底。
春寒瘦了一詩僧。

畫島題旗亭壁四首

長橋飛步穩。前度記乘槎。鼇背山浮出。碧潮涵晚霞。
平沙斜照斂。暝色度滄溟。明滅波相盪。漁篝亂似星。

散髮凌滄興。高歌且拍欄。魚龍驚欲舞。潮氣一樓寒。
鼇宮已翻倒。十丈聳潮頭。風雨捲龍氣。海天淒似秋。

集陶二十四首

集句蓋自宋人始。縫雲裁月本爲詩家一遊戲。降至明代漸盛。而清初黃唐堂專以此名家。若夫集陶句者。首屈指於元遺山雜著五首。予謂凡集句者。與原作古今別體。散對殊格。務標新異。而後始可矜匠心之工也。陶詩限五古。今掇其句。襲其體。所謂屋下架屋者。何所取乎。清詩別裁集載戴本孝律陶五首。其井竈有遺處。林園無俗情。但道桑麻長。而無車馬喧。

數聯幾有天衣無縫之妙。顧易亦有律陶八首。稍遜其工。吾邦詩家爲集句者。古來寥寥。豈非藝苑一闕典耶。今茲乙卯新春。予游函山。閒中得集陶五律二十有四首。選體極嚴。略盡其變。而止。乃因靖節出處。而次第之大。抵與歸去來辭互相表裏。但陶詩動輒有詰屈槎枒處。假令剪裁之餘。聲律而合。往往病不入格。比諸集杜韓者。復有徑庭。讀者宜寬假觀之。清飈矯雲翮。終以翳吾情。一往便當已。奇功終不成。豈伊君子寶。但顧世間名。日月依辰至。倏如流電驚。落葉掩長陌。離憂悽目前。榮華誠足貴。玉石乃非堅。邊

雁悲無所池魚思故淵。伊懷難具道。晨夕看山川。
黯爾懼時滅。終天不復形。弱冠逢世阻。飛蓋入秦庭。
流淚抱中歎。懷人在九冥。山中酒應熟。菊爲制頽齡。
驅役無停息。區區諸老翁。山川千里外。流幻百年中。
渺孤舟遠。淒淒歲暮風。清謠結心曲。烏盡廢良弓。
前途當幾許。投義志攸希。終日馳車走。一朝辭吏歸。
衰榮無定止。風水互乖違。淒厲歲云暮。泫然霑我衣。
靈化無窮已。投冠旋舊墟。揮杯勸孤影。臨水愧游魚。
逝止判殊路。榮華難久居。抗言談在昔。正賴古人書。
嘯傲東軒下。心知去不歸。栖遲詎爲拙。邑屋或時非。萬

好
理自森著。一觴聊可揮。貧居依稼穡。孰敢慕甘肥。
烏弄歡新節。薔薇葉已抽。草廬寄窮巷。嘉穉養南疇。
試酌百情遠。時忘四運周。于何勞智慧。世路廓悠悠。
不言春作苦。傾耳聽司晨。氣力漸衰損。江湖多賤貧。
居常待其盡。道路邈何因。去歲家南里。聊爲隴畝民。
傾身營一飽。斗酒散襟顏。忽值山河改。吾生夢幻間。
弊廬何必廣。虛室有餘閒。向夕長風起。紛紛飛鳥還。
道喪向千載。知音常不存。傾壺絕餘瀝。擁褐曝前軒。
靜念園林靜。而無車馬喧。昭昭天宇潤。曖曖遠人村。
且極今朝樂。時還讀我書。長公會一仕。仲蔚愛窮居。語

默自殊勢。身名同翳如。清風脫然至。遶屋樹扶疏。
邈與世相絕。關河不可踰。賢愚無復數。貧賤有交娛。
不學狂馳子。流觀山海圖。一朝敞神界。指景限西隅。
班荆坐松下。遶宅自蒿蓬。清氣澄餘滓。平疇交遠風。
啓途情已緬。當往志無終。高舉尋吾契。山河滿目中。
傾家時作樂。有子不留金。汲汲魯中叟。遙遙沮溺心。
冷風送餘善。微雨洗高林。去去當奚道。神鸞調玉音。
桑竹垂餘蔭。閒居離世紛。徘徊無定止。歲月有常勤。
鼎鼎百年內。悠悠東去雲。隻雞招近局。一遇盡慇懃。
叩柸新秋月。長風無息時。山川一何曠。寒暑自相推。我

願不知老人。皆盡獲宜。杳然望扶木。何事繼塵羈。
總髮抱孤介。余懷良已殫。詩書敦宿好。惆悵念常餐。
神力既殊妙。歲功聊可觀。挈壺相與至。安得不爲歡。
清涼素秋節。衆草沒奇姿。舉世無知者。人間良可辭。
枯形寄空木。好味止園葵。遂盡介然分。情隨萬化遺。
閒居三十載。相命肆農耕。往燕無遺影。寒花徒自榮。
谷風轉淒薄。夜景湛虛明。天運苟如此。吁嗟身後名。
開荒南野際。採菘足朝餐。卽理愧通識。躬耕非所歎。
運生會歸盡。風氣亦先寒。庭宇翳餘木。榮榮牕下蘭。
蒼蒼谷中樹。迴顧慘風涼。觴酌失行次。分明望四荒。及

時當勉勵所業在田桑。焉測塵囂外員丘足我糧。
揮觴道平素止有一劉龔。衣食當須紀箴規嚴已從欄。
庭多落葉冬嶺秀孤松。自我抱茲獨清顏止宿容。
我如當去客觴至輒傾盃。賜也徒能辯姜公乃見猜伊。
人亦云逝林鳥喜晨開。同物既無慮汎隨清壑迴。

次韻寄賣劍

萬里朔天隨雁歸。空山明日掩禪扉。松梢殘雪梅梢月。
悄地春寒壞色衣。
敢道一身無所歸。淨因打破鐵門扉。聰明奉佛古多例。
笑卸吟衫著衲衣。

續續十臺懷古詩

十臺續十臺。屋下架屋然。鄙意猶以爲慊也。頃乘閒。
自選新題乃作續續十臺懷古詩。

雨粟當年天亦哀。依然鳥跡遍蒼苔。終生識字傷人事。
萬古嘔心唯鬼才。許慎六書供考據。蔡邕八法費疑猜。
名山早晚藏難盡。欲起秦皇付劫灰。造字臺

寶劍千金持贈君。名賢心跡極殷勤。死生已矣嗟何及。
高義翛然洵未聞。玉帛重來悲舊國。衣冠一去賸荒墳。
臨風灑盡清秋淚。終古青山落日曛。挂劍臺

中原萍梗此生休。俯仰乾坤又值秋。落日雄關消紫氣。

西風廢徑問青牛。茫茫大道分三教。鼎鼎浮生奈百憂。
望氣臺

若是清虛能養拙。何須羽化玉京游。

越絕河山春正移。鷓鴣聲裏草離離。累年征戰同蠻觸。

驚世功勳有種蠡。竊識君王類鳥喙。翻令煙水送鴟夷。

誰憐坐臥久嘗膽。歌舞高臺纔一時。越王臺

西風漢上客衣單。古意蒼茫晚照殘。流水高山依舊在。

瑤徽玉軫向誰彈。從來刎頸談何易。真個知音值又難。

極目楚天愁不盡。一湖秋色敗荷寒。伯牙臺

落落乾坤大布衣。挺然釋難古來稀。唯將氣概排秦帝。

直馭風雲解趙圍。辭贖千金同敝屣。射書一箭濟危機。

先生玉貌堪冥想。萬古碧霄鴻鵠飛。魯連臺

試上嶠嶢磴勢危。祖龍遺跡邈難知。關河烽火銷兵後。

滄海波濤鞭石時。他日宮中看圖讖。幾年天下裹瘡痍。

鉅碑善頌漫多事。誰料咸陽水德衰。瑯琊臺

袍笏尊前聯句催。撞鐘伐鼓盡歡來。功名莫怪衛青貴。

滑稽又知方朔才。纔是東巡塞瓠子。欲從西極獲龍媒。

武皇得意便當止。遲暮胡為悔不回。柏梁臺

河梁一別首重搔。萬里黃雲魂夢勞。枉使史公成發憤。

既輸飛將負餘豪。傷心絕塞龍沙遠。轉眼故人麟閣高。

當日生降何面目。五千鐵騎葬蓬蒿。李陵臺

伏符呈瑞起炎精。始見真人帝業成。亂世群雄無大志。中興諸將尙專征。龍拏虎擲風雲變。地老天荒歲月更。萬古英靈想餘烈。西風落木作軍聲。千秋臺

庭梅漸開即吟一首 蕭薰

嫩日忽催鶯語長。昨從月下暗聞香。南枝開遍北枝未。絕似徐妃半面妝。

塞下曲

天山飛雪大如席。戰罷平沙流血赤。十萬漢魂何處歸。啾啾夜繞燕然石。

遠湖權歌三十首

遠湖即濱名湖其南岸古來驛路所通而前賢賦詠極罕洵為可憾焉今茲乙卯仲春予旅食數日略盡其勝概獲絕句三十首題曰權歌者因多言舟楫之事且沿朱十鴛湖之例也鄙意聊欲資後人來游耳鴨頭綠水遠於天微雨初晴沙樹妍宛轉橫拖橋萬丈斷虹劃破一湖煙一枝柔艣截驚瀾日出前汀宿霧殘昨夜落梅風更峭微茫水國尙春寒魚龍影裏看潮生天與詩人放晚晴隔岸群山春晻靄芙蓉潑眼半空明

倚棹聽風雨

沙嘴波平繫短槎。館山樹色夕陽斜。依稀金碧恆河劫。
魚板聲中僧賣茶。絕壁古松龍氣腥。幾人碧葬水泠泠。于今浪激風號夕。
月氣青於鬼火青。雨後東風作驟暄。辛夷花發老漁門。夜來新水魚苗長。
七櫂渡邊春漲痕。欲續年時鷗鷺盟。水天閒話愧漁兄。臨風莫臨公無渡。
笑指煙波打槳行。青山倒影白鷗飛。水寺鐘殘欲夕暉。萬頃春波風正穩。
琉璃盤上一帆歸。

秋香吟廬詩金 卷三

紅

天低參尾渺關河。霸氣銷沈歲月過。賸得湖山麗於畫。
桃花紅貼白蘋波。對浴鴛鴦一惹情。湖邊女子可憐生。朝朝郎刺漁舟去。
妾倚茅檐織席成。綠漲溶溶疊細漣。清明時節嫩晴天。銀魚上網爭移櫂。
猪鼻湖頭鴨嘴船。紅杏花殘燕子飛。湖邊昨日送春歸。魚羹不羨宋家味。
嫩筍抽時海鯽肥。海神亦作不平鳴。百里猶聞鼓盪聲。煙水荒荒湖尾暝。
榜人得意卜陰晴。

敢請五嫂魚羹美

紫燕

東坡先生詩

大自居詩

卷三

九

七十洋頭鵲影飄。南天無地海雲遙。吳儂生長舟爲宅。
來往湖濬慣弄潮。尺大鯔魚跳入船。鸞刀斫膾酒如泉。醉餘領得新秋月。
貪看清光不肯眠。江鄉蠙稻當生涯。漁唱人歸鷺拍沙。柳陌菱塘堪畫處。
板扉臨水是儂家。雨霽迴塘盪槳過。小娃工唱采菱歌。盈盈一水三十里。
天女洲邊霞綺多。淡黃海氣罩江郊。雨帶龍腥風勢交。十丈亂濤高似屋。
驚看孤艇挂松梢。

浦雲島樹水潏洄。當面群山螺髻堆。一味新涼雨過後。
小舟滿載綠蘋回。蒹葭蓑衣一葉舟。渺茫煙水碧鱸秋。長年解唱漁家傲。
倚棹沙頭矯似鷗。天際歸帆幅幅齊。西風度水晚淒淒。落霞紅蘸湖波綺。
十里黃蘆蘆虎啼。扁舟歸去夜潮寬。露氣先秋衣欲寒。大草山前煙散盡。
湖心忽漾爛銀盤。斷磯停櫂浪花平。勝景偏宜赤壁名。如此江山明月夜。
可無孤鶴掠舟鳴。

平沙曬網夕陽前。臨水人家屋幾椽。矜道一塵飛不到。
蓼花門外白鷗天。松靄綠勻初日涼。分明渲染畫秋光。湖天昨夜霏微雨。
潤得四山葦氣香。蠡天霜信早楓斑。瀲灩波光碧玉環。目送前汀雙槳遠。
倒從湖底看秋山。殘秋樹色晚煙疏。菱蕩菰村過雨餘。拍岸寒潮乍搖盪。
孤舟篝火照叉魚。持螯顧曲夜開尊。浪跡煙波又一番。絕似江南腸斷地。
漁家扉接妓家門。

歌喉扇影鬪風懷。長板橋南小住佳。最是夜深人定後。
銀燈高下繪秦淮。鱸亭蠡舍妙堪圖。我亦江湖一釣徒。慣向水雲深處臥。
權歌好續小長蘆。

三月二十日岐蘇值雪車中賦長古一篇紀之。
萬仞高崗雲凍結。捲地北風何栗烈。鴛鴦千群翔太虛。
羽毛亂墜看作雪。鐵軌飛輪疾於鱗。車聲雷吼度嶠嶢。
群山揖吾皆却走。玉立低昂萬笏朝。貂裘寒透便思酒。
容易空腸吸一斗。爛醉寧顧傍人呵。獨倚車牕笑矯首。
閭浮一白盪寒光。密竹折盡巨木僵。禽飢獸凍野無食。

大壑冰合蛟潛藏。瀑聲依然千巖震。琪樹搖搖冷雲襯。
 下有澗玉之琤琤。峽勢愈蹙崖愈峻。松石渾如畫中看。
 絕壁欲處老幹蟠。勝境特推臨川寺。通神佳手寫亦難。
 迴風旋作羊角勢。霏霏灑遍六花細。恍疑身騎白鳳凰。
 橫絕瑤界渺無際。憶昨倦游賦東歸。傷心時節近授衣。
 此間月下貪程過。夜深來款澗戶扉。涼蘿繞屋四山靜。
 碎佩叢鈴陰蟲警。露氣吹入一燈青。凝坐不覺發深省。
 黃梁一夢二十年。行李重來了勝緣。多謝老天工變套。
 奇景可無奇句傳。酒醒又怯肌欲粟。瓢底殘瀝歌可續。
 田家定是慶年豐。爐邊瓦盆聲非俗。懸棧一路連故關。

此言神洞
始於今乃不
其言也

從此無復征途艱。車行乍速觀止矣。送盡賸水與殘山。
 俄頃牕外紅日爛。極日陰霾全消散。出險真同退院僧。
 矧看寒燠眼前換。墟落炊煙霽景暄。晚梅花白野人門。
 漠漠春田青正嫩。麥苗怒生土膏溫。日午停車洗馬驛。
 背指峽口崗脈隔。決皆黯慘猶同雲。千山萬山濛然白。
 阪茅田正臣華甲壽言集唐四句。

裁霞曳繡一篇篇。方干句引春聲上綺筵。唐彥謙今日看君顏
 色好。顧況始知地上有神仙。白居易

森川竹磴見似近。作次韻却寄。
 忽值清明節。村園樹樹花。素心憶之子。佳句自名家。病

起春方霽愁殘鬢有華遲君追夙約移屐水之涯

夢游猊鼻溪歌寄佐藤猊巖衡用須田古龍文紀

游詩韻

太初元氣鍾至誠沙鐵川畔駢萬巖紫蓋翠柱森排列
其中靈祕雲霧緘莫是群真所游戲清隱山書封玉函
欲言鼎鑄尙有耳謝屐憾未踰岑崑昨夜夢落仙臺北
飽餐煙霞嗤老饒數峰相邀妙於畫譬如一滴知海鹹
峽口傲舟溯洄處岸上琪樹何森嚴溪光盪漾山影碎
灘急不容來往帆奇巘斷崖難名狀除却巨靈誰刃剗
苔鏽鏡面猶可鑑巖鏡依然神異驅怪獯鄰之凌雲巖名千

初時輪囷糾結真天鏡忽有龍腥氣噴薄訝然洞室開

懸險鍾乳洞仙蝠爭飛撲人臉大地幽冥終古賦偃僂秉燭

心竊怯陰風吹亂毛髮髟鍾乳下垂繁於穗瑤光四射

穿空嵌古桃名溪夾溪迷遠近百藥生處降巫咸少婦壯

夫共巖名巧相配婀娜剛健皆超凡錦壁曲屏共巖名泝湍至飛

沫灑雪涼滿衫猊鼻巖名噴水洵奇絕勢如建瓴如瀉槭

峰轉溪迴十七曲武夷之勝休呢喃一聲清唳震林壑

縞衣何禽棲紫杉遽然夢醒破牀上牕外竹樹晨箭撥

嗟我於世寡所偶何物窮鬼長相監泉石膏肓意未飽

纔是忘憂親酒盃安得重理羨門舄閒雲野鶴俱颯颯

盃

形釋心融合萬化。煩事短長都掃芟。便將夢境細相較。飛步溪山斜照銜。東道主人久相埃。意中雲樹連碧巖。聊爲先容攀險韻。囑君莫斥辭沾沾。

四月十八日與好文會諸子飲。午下相攜散策看花城東。遂抵鴻臺。賽手胡奈祠而還。是日陰晴不定。微雨時到。

綠溼紅鮮入畫圖。仍愁煙雨滿平蕪。賈將餘勇看花去。醉步蹒跚一傘扶。彩霞圍繞寶樓臺。彈指華嚴法界開。鐘鼓聲殘僧入定。諸天花雨一時來。

春雲匝匝雨絲昏。花弄輕顰蝶斷魂。金井墨堤嫌熟套。城東新得小仙源。

綠蓑人立釣魚缸。漾漾潮平白鷺雙。例不須歸漁父樂。斜風細雨滿春江。

微雨小亭簾影低。連天遠樹綠煙迷。重來須買涼千斛。四面青蘆聽水雞。

澄江如練暮山蒼。形勝依然古戰場。猶記年前儻舟下。鴻臺夜月白於霜。

陌頭雨洗軟塵紅。悄地鶉愁春欲空。幾個樓臺迷遠矚。滿城樹色綠濛濛。

法堂磬斷碧嵐凝。一入招提心地澄。不用攢眉訪蓮社。長齋我亦在家僧。

一現曇華心暗傷。殘碑表烈跡淒涼。玉情瑤怨譜難盡。萬葉集中歌短長。

遺事千秋恨更新。從來色界奈迷因。落花紅灑胭脂井。似弔當年薄命人。

煙波曾入昔賢歌。滿目滄桑歲月過。沙鹵新開田萬頃。漁莊鱗舍已無多。

錦囊歸後補成篇。欣與鶯花了夙緣。但是出門遲一日。銷魂定值杜鵑天。

五雜組十首

五雜組。世所捐。往復還。休問天。不得已。伍少年。
五雜組。謀生拙。往復還。貴賤別。不得已。故交絕。
五雜組。心如擣。往復還。長安道。不得已。策扶老。
五雜組。春夢婆。往復還。荆棘多。不得已。浩浩歌。
五雜組。慣歌鳳。往復還。抱餘痛。不得已。笛三弄。
五雜組。吳市箎。往復還。死逾奇。不得已。豹留皮。
五雜組。翻覆手。往復還。謀諸婦。不得已。薄薄酒。
五雜組。莫獻玉。往復還。劍埋獄。不得已。理舊曲。
五雜組。少辭家。往復還。太行車。不得已。末路嗟。

五雜組磊落才。往復還舉世猜。不得已歸去來。

題吳俊卿昌碩花卉圖

亂餘海上姓名揚。識得吳生遠擅場。攝取常州真本領。一枝硬筆破天荒。

讀水滸後傳四十首

忠義堂前酌一杯。金沙灘上夕陽頽。姓名早已動蠻貊。氣焰難消是禍胎。

吳越同舟看至情。綠林豪俠續前盟。今宵要灑仇家血。酒氣吹燈劍又鳴。

數奇幾處誤英雄。調虎離山計亦工。絕似青州當日慘。

滿城瓦礫血痕紅。

雲雨荒唐老更癡。誰知春恨蹙蛾眉。招姦銜色禁難得。世上仍多谷樹皮。

長箭雕弧獵騎奔。一腔俠氣雪奇冤。野花紅膩夕陽裏。莫是麗華媿血痕。

陶朱當日苦經營。底事風雲頃刻更。飲馬川頭旗幟壯。果然衆志儼成城。

趙圍魯酒例牽連。殺氣憑陵洞府前。旋向白雲坡上住。風塵潦倒活神仙。

孤孀三口兩家存。長掩雨花臺下門。鐵石心堅矜苦節。

浮萍錯道本無根。
萬頃玻璃開太湖。打頭風起客舟孤。偶然再會頻悲喜。
曾似潯陽午夜無。
穩臥吳王銷夏灣。何堪魚稅吏胥姦。若教黑獄銜冤死。
玉版祥符亦等閒。
夙慕虬髯志氣殊。樓船破浪觸蓬壺。金鼇島上應佳讖。
萬里天南新版圖。
傳家神射服群蠻。吳蜀成婚且破顏。整頓乾坤知有日。
敢輸三箭定天山。
美人畢命繡幃空。半夜殘燈慘不紅。却是讒諛有餘毒。

株連幾個又飄蓬。

野梅門巷薄寒天。逋客相逢亦夙緣。翠袖佳人病初起。
前身應是月宮仙。
燕雀君臣醉太平。北天封豕忽縱橫。苦心纔復六州土。
無奈空城鬼哭聲。
劫後潯陽猶有樓。數行醉墨寫奇愁。重來江口洒紅血。
咽斷寒潮九派流。
幾處報仇唯恐遲。可憐血性是男兒。就中雙廟斃三虎。
意氣曾輕博浪椎。
殺聲捲地火光紅。豺虎心驕墮術中。聲價初高神算子。

三千鐵騎亦沙蟲。
桓桓驍武冠三軍。嗣得箕裘名共聞。當日黎陽戰殊苦。
恨無破虜樹功勳。
皂旗昨日渡黃河。奈此金湯難守何。玉帳西風鐵衣冷。
一天星月雁聲多。
白日無光霜欲飛。陰森冤氣鎖圓扉。誰憐富貴頻招禍。
鐵券猶存亂世非。
一朝袍笏化青燐。遺臭于今猶覺新。慷慨絕奇王鐵杖。
莫嫌劍俠傳中人。
護龍河水血流紅。愁絕汴京王氣終。正是青衣行酒日。

胡塵無地起英雄。
山河板蕩暗吞聲。青子黃柑輸寸誠。北狩倉皇悔何晚。
絕憐誤國是聰明。
豺狼窟裏幾回經。故國滄桑涕淚零。排難可無神庇護。
心機矧勝智多星。
地坼天崩勝敗分。火光四面騎如雲。無端憶得盤蛇谷。
焚盡烏戈藤甲軍。
彈劍尊前一浩歌。算來罪案不堪多。爾時非灑奸臣血。
其奈英雄積悶何。
靖忠廟下薦蘋蘩。玉斧河山落照昏。煞曜罡光遺像在。

賸將浩氣滿乾坤。
六甲難禁胡騎瞋。
枉教二帝歎蒙塵。
匹夫弄詐猶閒事。
別有衣冠賣國人。
亂後方傷社稷輕。
一朝叫絕渡河聲。
莫援殘局徒酸鼻。
笑上長風萬里程。
九轉靈丹腸九迴。
冤魂泣血有餘哀。
當初火點龍袍處。
敢信生前澤水災。
相府冰山勢絕倫。
滿廷無復一忠臣。
可憐好色萌非望。
銀鑰卻收金屋春。
明珠峽口破圍回。
慘澹陣雲城欲摧。
彈指興亡覆棋局。

錦帆忽自日邊來。

一笑妖髭漫陸梁。
蛟龍雲雨豈尋常。
昇平有象君看取。
兵氣銷爲日月光。
殿上衣冠華夏同。
替天行道是英雄。
樓臺春麗瑞雲外。
簫鼓聲遲明月中。
廿四青螺指顧間。
樓船取次凱歌還。
南邊無復風波警。
漁唱相和蜃氣閒。
牡蠣灘邊一艇橫。
君前泣血訴平生。
扈從併是修朝貢。
知與韓彭雪賊名。
泠泠魚梵一菴幽。
老後參禪萬慮休。
賸得話頭傳本事。

鴛鴦樓上鬼啾啾。

幾朵海棠春色佳。滿堂華燭兩行排。瑤池飲罷同霑醉。

矧是簫聲鸞鳳諧。

銀花綠酒綺筵開。準擬元宵戲劇催。一體君臣歡不盡。

賡歌絕勝柏梁臺。

玉波冷雙蓮

唐處士李羸夜游震澤逢女郎爲歌玉波冷雙蓮之
曲曰此哀吳宮二隊長之詞又歌其所製芷秀葍華
之辭蓋龍女云事見具區志二曲皆不傳高青邱嘗
爲補之予亦倣顰云

雙頭蕊碎芙蓉泣。嬌紅吹翦金風急。君王掩面宮娥悲。
階下土花青血溼。將軍真有破楚才。震盪中原霸圖開。
當時儻料沼吳禍。盍斬西施梟蘇臺。鬼燈如漆夜雲杳。
髣髴倚柳弱魂小。蛟潭風黑迸餘腥。露氣橫江秋不曉。

芷秀葍華

具區志云女郎曰某非人也生于龍宮好楚辭君能
受我一曲傳于世人乎乃以水晶簪扣盤而誦芷秀
葍華之辭卽其歌爲楚聲可知也憾青邱以五古出
之斷不相副予今改其體唯愧辭不古妙耳

桂楫蘭橈兮汎汎中流。芷秀葍華兮鬱鬱長洲。今夕何

夕兮邂逅且留金罍兕觥兮願從公子以游月落雞鳴
兮四野幽幽搔首踟躕兮我心孔憂

題梁伯龍江東白苧後

紅樓翠燭憶吳閫牙版拍殘鈿笛長好是小山笙鶴後
酒邊新調按宮商

吳儂水調妙無雙絃索雖存歲月降白苧終然同白雪
銷魂譜入魏家腔

紅綃紅線繼元人看到浣紗規度新詞彩翻憐零曲在
繡羅一片照青春

輓川上巖華

元

越國多才雋如君最絕倫雄文餘浩氣高操想先民閱
歷堪經世聰明豈累身醫和今不見蒿里淚霑巾
儒雅誰相匹杏林才自奇久將識君面矧道喜吾詩芍
藥花如泣杜鵑聲正悲行車旋擘管渺矣白雲思

黃花岡歌

清末宣統三年三月革命黨首領黃興潛約其衆由
香港抵廣州粵督張鳴岐偵知之搜捕頗嚴興等將
暫解散而羅網周密進退維谷乃決意二十九日早
晨纏白爲識挾短槍炸藥直襲督署與衛兵巷戰遂
破之入署大索鳴岐已逃去旣而州兵麇至革命黨

迎之再戰無不一以當百然衆寡不敵復避於香港
其被戕者凡七十二人皆少壯有爲之士越四月初
三州民以禮殮之尋叢葬於東門外黃花岡八月武
昌舉義天下響應愛親覺羅氏遂遜位諸烈士之志
幾成矣予頃讀清末雜史有所感卽賦此云

萬道火槍殷似雷十字街頭府兵來彼衆我寡須健鬪
殺氣蔽天天日哀天際血雲凝欲紫翻盪洒地如海水
粲可數者屍縱橫七十二人同時死史堅如唐才常殺
身成仁氣軒昂知君私淑同終始壯圖一蹶淚溼裳風
雲變化真不測旋見曼珠朝威熄黃鶴樓前萬馬屯大

別山頭烽煙黑滬上會燕都盟民國興革命成伸得三
百年來之積憤泉下一笑死猶生黃花之岡勢何壯黃
土昨將毅魄葬形勝應似晚霞丘在美國費府其國人
抗英國始舉義旗處地分半球
屹相向仙之人兮跨鶴游彈指空中現瓊樓欲援南斗
奠椒酒黃花怒開繡清秋我願他日岡頭樹巨碣雕鐫
名字石面滑乃於其陰大書云黃帝紀元四千六百九
年春三月

次韻答滬上岸田雨臣衡見寄

老來倍懶踐名場蓬戶居貧似竇章誰識儒心例憂憤
翻欣廟略正張皇游蹤每顧江湖遠詩卷須留姓字香

何日隨君探禹穴。側身西望海天長。

落合東郭爲誠囑題遠風詩境圖

嵐影似海初日涼。埃樹如萍辨微茫。甌婁汗邪綠浪裏。
萬頃遙引風路長。流水濺濺環墟里。良苗懷新雨後起。
一行白鷺飛上天。旋見寥廓澄餘滓。活筆濃淡天機存。
舒卷使人滌塵煩。當初丁寧敕畫史。心賞須與靜者論。
熊城東去平如掌。阿蘇山色連莽蒼。一帶川陸杳渺青。
稻香乍吹顛氣盪。我行往日何忽忽。猶識斯圖景趣同。
聞君桑梓郭邊在。白屋併作點綴工。厥土黃壤宜稼穡。
九穗嘉禾豈難得。又產偉才地逾靈。謂是士人之冀北。

君家外祖真碩儒。謂元田東野侍講先帝徵起恩遇殊。紫芝敢擬商

山皓。終生東壁挾經趨。欽君絕無紈袴態。平明端笏侍

南內。東郭今官侍從殿角薰風題壁時。想見朝衫搖玉佩。晚出青

瑣緩步歸。烏几黃卷靜掩扉。舒嘯對圖不知倦。詩夢時

向故園飛。臺閣文章瑚璉器。祖風宛然看高致。載歌白

雪贊康哉。解道聖主拂吁意。卽今雨露頻有年。豚蹄壺

酒休禳田。安得聯襪畫中地。笑賦幽風八月篇。出處輒

知國士貴。患冷患熱兩無謂。吁嗟乎林泉之下要懷廊

廟大經綸。軒冕之中莫亡田園真趣味。

梅雨雜詠

秋香吟 卷三
據梧心地似餘醒。溼透琴書愁又生。畢竟老天無定準。
一簾煙意幾陰晴。
坐臥唯聞鄰寺鐘。天教詞客故疏慵。昨憐衆綠綺於繡。
雨裏旋看煙樣濃。
四檐梅雨坐宵深。青草池塘蛙鼓音。憶起殘春酒消盡。
五更攪得惜花心。
溼翠吹迷細雨中。蕉天苔地只冥濛。杜鵑啼後花初放。
偏向假山幽處紅。
雨氣和煙濛不披。滿庭大葉綠參差。稚兒笑指黃金顆。
一樹枇杷始熟時。

村女嬌歌悄可聽。依微樹色繞郊坰。颯然雨過晚煙暝。
拖到新秧插處青。
標地有聲梅子黃。午眠纔醒倚茶牀。蝸牛不似先生懶。
黏壁能成篆幾行。
檐外雲低雨又來。綠濛濛地長新苔。絕憐輝映赤於火。
階畔石榴花正開。
環舍唯聞響暗渠。黃昏倚檻雨晴初。一林漠漠欲成霧。
悄見簾前月氣疏。
棗花庭院日西銜。倚盡藤牀嗟骨凡。節到斷梅天驟暑。
浴餘好試白蕉衫。

堀切觀菖蒲花

黃梅雨霽青帘翻。薰風吹遍菖蒲村。日午畫輪軟塵起。依稀認得薛濤門。五雲圍住花綽約。白曝輕綃紫懸幕。綠水併蘸裙影紅。步度平橋腰肢弱。旋看涼陰趁斜暉。江臯樹色帶煙霏。有所思兮將相贈。滿把膩香買花歸。

銷夏雜詠用陳碧城雲繪園韻

鎮日風簷下。村居異吏衙。晚來涼更盪。茉莉一盆花。北軒醒午眠。伸脚欣無襪。一雨過前庭。微涼吹石髮。溪山作臥游。讀書情殊愜。秋氣壁間生。虛堂寬帖帖。夢斷風方曉。月痕煙外消。前宵疑有雨。露重擺芭蕉。

盆裏碧牽牛。娟娟露含色。唯愁赤日高。午影當階直。高寒紫霄上。羽蓋憶茅君。讀罷神仙傳。悠然看白雲。新詩吟又就。日永足清娛。七尺涼堂裏。冰心似玉壺。溽暑消無跡。雨餘涼滿庭。微風邀晚日。欄角集蜻蜓。涼颼入虛幌。四壁起吟蟲。半夜旋欹枕。秋聲在井桐。疏花似人悄。倚檻滿衫秋。木末低銀漢。露華螢共流。阪茅田招飲。好文會諸同人。於鎌倉別墅。酒間賦似用杜少陵游何將軍山林十首原韻。

溪上戴顓宅。清風過小橋。苔香纔滿徑。樹勢欲凌霄。懸榻每相待。報書今見招。此間愛幽僻。百里帝京遙。

虛閣簾波碧。薰風入座清。晚花憐倦蝶。夏木尙啼鶯。石
古堪題字。筍肥宜作羹。欣然忘主客。聯屐且吟行。
屋後攀危磴。何須短策支。峰高雲出岫。澗斷水通池。舊
國山河美。素心猿鶴知。煩襟涼滌盡。野色眼前披。
每輸同社彥。題壁筆生花。門外誰歌鳳。尊前笑畫蛇。十
年身未遇。隨處酒先賒。耆宿饒清福。如君復幾家。
辭官方耳順。高臥洞天開。宰相今無檜。神仙昔姓梅。松
濤當午起。蟬響引秋來。一榻茶初熟。微嵐襯綠苔。
山樓如畫裏。詩思湧於泉。群嶂駢仙掌。奔雲擘亂綿。檐
深宿榴火。壁潤貼苔錢。更唱右丞句。田家憶渭川。

林巒吹爽氣。閒試酪奴香。滿院松雲溼。移牀竹韻涼。世
情頻變易。心跡任行藏。欲做抽身早。免看雙鬢蒼。
一亭容我醉。正憶習家池。徑仄勞游屐。花低礙接羅。淺
沙鳧傍母。故壘燕將兒。樂此忘炎熱。何當日夕隨。
境寂人非俗。吟懷澹似雲。慣聞蕭寺磬。去搗古碑文。衆
綠曖將合。晚霞晴乍分。黃昏風度徑。栢子落紛紛。
江郎歎才退。落筆意如何。既以同心許。寧慙累句多。遙
山拖暝色。古徑起樵歌。後約頻相囑。花時載酒過。
鎌倉散策用少陵重過何氏山林五首韻

勝游疑日短。久矣倦攤書。煙水如邀客。雲山誰結廬。欲

秋碧山房詩集 卷三
沽新釀酒快斫細鱗魚。笑指金鼇島。亭臺似帝居。
滄桑經浩劫。世運感推移。難免蕭牆禍。絕憐豚犬兒。衣
冠賸荒塚。禾黍滿平陂。更問名藍跡。蟲聲出敗籬。
海國秋初到。蕭蕭落照時。片帆欵入畫。孤磬悄催詩。叢
樹帶蟬語。西風吹鬢絲。可憐華表鶴。千歲與誰期。
七里濱頭路。低徊萬感長。乾坤經戰伐。沙礫沒刀槍。九
世司兵馬。八州饒稻粱。想當天定日。末運乍倉皇。
步屨隨爺後。初遊正少年。一筇披亂草。幾處薦寒泉。海
氣暝籠樹。稻香秋滿田。風光宛如昔。俯仰倍悽然。

夜自畫島歸六首

散髮高樓飄欲仙。醉歸又值月明妍。浩歌倒捲海濤立。
涼盪魚龍變化前。
涼風浦口舫聲還。夜色淒迷煙水間。遙指西南天盡處。
高低鬢影豆州山。
長橋醉步履聲幽。月射金波一道流。雙袖風翻涼到骨。
晚來潮氣爽於秋。
燈火樓臺夜未央。島雲祠樹乍蒼茫。漁舟歸處潮方漲。
一陣峭風魚氣涼。
平沙岸潤水溶溶。迴看仙山樓閣重。一片浦雲無住著。
飛來抹盡海門松。

步上沙隄涼滿衣。一川露氣夜依微。篝燈影亂青蘆岸。
風款漁家白板扉。

讀今關天彭

壽

山東攬古賦此乃寄用其近作韻

海岱浮雲白日陰。無端人事奈銷沈。斷碑尙憶嬴劉業。
載籍誰研洙泗心。舊國衣冠多痛淚。當年鴻雪愴離襟。
塌來變局又回首。擊筑尊前一浩吟。

與達澤菖水飲賦似

十載升沈久。風塵悔浣衣。酒盟逢舊雨。涼意愛斜暉。古
道誰相尙。知音世自稀。明朝趁秋霽。煙水暫忘機。
聞竹磎病漸癒。乃寄用其舊作病中雜句韻。

三尺簾波涼意深。殘蟬咽斷晝沈沈。階前一葉無情思。
驚殺病餘詞客心。

牀邊偏喜暑威空。昨夜秋生蟲語中。瘦了斷腸花一朶。
疏籬難障是西風。

華年錦瑟儘多情。豔說新腔嬌似鶯。骯髒如今多感慨。
可無鐵版激商聲。

竹牀瓦枕一燈疏。久廢吟詩與讀書。但喜西風蘇病骨。
已涼天氣曝衣初。

圓銅塵暗不須磨。潘恨宋悲如爾何。悄地孤眠清欲絕。
綠牕夜靜藥煙多。

矮屏圍得篆煙斜。病起無聊倚碧紗。敢道江郎才已退。當初綺語豔於花。

碧簾涼生聽雨眠。豆花籬落早秋天。嘔心例作詞人病。消瘦一年多一年。

顧影自憐雙鬢斑。斜陽深巷掩柴關。只須壽梓江湖遍。

一卷新詩續得閒。

集名

紫陌紅塵常似春。輕肥婚世夙輸人。去參方丈維摩室。閒煞中年居士身。

換骨難求九轉丹。酒悲詩瘦思無端。一簾風露一牀月。秋自蟲邊催早寒。

夕陽如水蘸蒼苔。早晚東籬看菊開。莫向詞中重寫恨。新涼昨日賀秋來。

倚几玄談客解頤。清癯枉道與秋宜。最難消遣詩愁在。藥氣吹燈夜臥遲。

又次其近作韻

燭暈秋深紗帳邊。銅瓶插得數花妍。斷腸時節蟲聲咽。聽到五更淒不眠。桐陰疏處獨凭欄。悄向西風鬢欲殘。瘦不勝衣秋到骨。病餘倍覺遣愁難。

次湯河遠洋

元臣

近製詩韻

露氣蒼茫月墮江石頭城下倚篷牕休言天塹難飛渡

長江舟中

潮打山圍空作邦金陵懷古偏安南渡恨難勝當面鍾山青幾層莫自雨花臺上望

讀翦燈新話二十一首

斜陽流水匝金陵水宮慶會錄草得上梁文一篇凌波舞罷醉瓊筵滿囊珠玉歸裝重

翻笑韓家諛墓錢三山福地志扑朔鬼隨宵正深歸來自恥報仇心若非梨棗除荆棘

何識前生是翰林華亭遇故人記華表遼東鶴不回湘纍萬古有餘哀英雄好亂漫多事

幾個真推管樂才金鳳釵記鳳釵證得夙因奇看白幻中情更癡容易離魂償業債

文君疇昔夜奔時聯芳樓記百尺高樓倚碧天紅閨詞筆久流傳蕭郎豔福誰相匹

姊妹花開朵朵妍令狐生冥夢錄年來傲誕世間聞未信他生應報分却有冥司彰直道

旋饒折檻一朱雲天台訪隱錄樓船載國忽漂淪話到興亡共愴神松醪勸客譜金縷

當日桃源無此人芙蓉泣露悄為別菴畫湖山憶昨游三生慧業話風流

依舊西軒煙水秋。

滕穆醉游聚景園記

一魄守骸冤恨長。何人黑夜到西廊。浮生荒惑又無數。

何啻蠲體成粉粧。

牡丹燈記

賦罷催粧夙恨平。金環魚扇儘多情。寧如夢裏長相見。

又騎青鸞到玉京。

渭塘奇遇記

幾載蓬蒿仲蔚居。識文有驗素心舒。旋看淮上兵戈起。

卅萬生靈鬼一車。

富貴發跡司志

豐都天黑銅妖蛇。疑獄終然判正邪。夢裏功名輒延壽。

當初落拓不須嗟。

永州野廟記

古廟無人缺月孤。亂雲四合怪禽呼。騰身先破妖邪膽。

賴有腰間金僕姑。

申陽洞記

雨打梨花春盡餘。干戈滿目淚漣如。可憐玉碎捐軀日。

難寄崔徽訣絕書。

愛卿傳

鳳別鸞離怨翠閨。風塵重遇有餘悽。到頭難索黃衫俠。

枉作鴛鴦塚上栖。

翠翠傳

擊鼓吹笙興不窮。月明照徹水晶宮。靈胥儼在三高上。

醉裏又誇詩句雄。

龍宮靈會錄

骨碎魂飛死亦難。偶然奇禍一身單。只緣罵鬼驚凡俗。

却自冥司得美官。

太虛司法傳

一去塵寰滌不平。刊書偏喜故人情。晚生何德媿顏卜。

仍道修文選亦精

修文舍人傳

白榆深處謁天孫。相囑人間雪我冤。獨怪歸來收跡早。絕無警世妙辭存。

鑑湖夜泛記

當時錯怨賈平章。富貴神仙夢一場。再世姻緣長不盡。竝頭蓮底宿鴛鴦。

綠衣人傳

十年斷盡舊因緣。無復鸞膠續鳳絃。寄語嫦娥猶記否。秋香亭上照嬋娟。

秋香亭記

同菖水蓄堂。訪土肥鶚軒於鎌倉別墅。偶散策不在待之良久而歸。乃賦似集杜一首。

野涼侵閉戶。此日意無窮。獨鶴歸何晚。清尊幸不空。亂

雲低薄暮。喬木易高風。邱壑曾忘返。形骸痛飲中。

是夕既望。月色殊佳。次蓄堂韻。

西風吹顛氣。既望月當樓。樹影低相錯。露華涼欲流。斯生唯縱酒。與爾一悲秋。疇昔孤吟永。漫思袁渚舟。衣上清輝冷。笛邊知有樓。關河感今古。主客悉風流。宿鳥爭高樹。叢蘭媚素秋。煙光渺無際。一壑欲藏舟。

成趣園所見賦似鶚軒五絕十首

一境無塵氣。何來夕磬微。好山迎面起。嵐翠染簾衣。泉石愜吟情。拍肩快良晤。一蟬淒送秋。斜日低庭樹。一峰濃翠流。當檻勢夭矯。鬱鬱只青松。靈簫響雲表。

涼颼吹入樹。瑟瑟動秋心。殘照在鴉背。歸雲看結陰。
杳然微靄暝。青翠錯巖阿。露底蟲初活。晚來秋意多。
淪漪漾池面。巖際暝煙幽。樹色潤於沐。灑然生遠秋。
遠眺秋光淨。風煙檻外橫。吟詩成頓悟。野濶月初生。
秋兼碧落高。露洗蟾光冷。風過短牆前。胡枝花弄影。
階前露仍白。吟屐步清晨。一徑繚而曲。秋花媚向人。
微風池畔起。殘靄忽無痕。霽色生林罅。禽聲聽不喧。

補和鶚軒中秋之作

玉臂雲鬟例怕寒。滿簾露氣夜漫漫。鄰樓笙斷月初轉。
儘是閨中憐惜看。

東郭過訪賦似

眼前搖落近。且喜小園幽。蟲語夕催露。桂香涼颼秋。蹇
予殆成病。舍子豈云游。渺渺江湖思。何當一醉休。

戲題士女圖追和吳梅村

此題吳穀人嘗翻入曲。嚼徵含宮。洵推絕調。予曩欲
併之譜調。笑轉蹈一套。而未嫺倚聲。乃沿其舊。亦以
絕句出之。唯務標新意耳。

五湖煙水放篙遲。老後風懷惜豔姿。一入吳宮過廿載。
掩羞同否浣紗時。一舸

燭暗歌殘玉帳前。大王意氣尙依然。翻憐不使衝圍走。

攜手笑登亭長船

虞兮

旃帳秋殘漢月明。琵琶彈罷若為情。須知一女安天下

閒却防胡萬里城

出塞

十載穹廬悲憤餘。胡笳按拍淚漣如。曹公盛意寧難解

為是多才記父書

歸國

一例私奔窮後回。臨邛亭下意低徊。當初唯感琴心豔

那識長卿辭賦才

當壚

樓下青苔賸血痕。忽看金谷化荒園。驕奢久已招群怨

未必名姝是禍根

墮樓

素面畫衣深夜看。絲蘿喬木兩情歡。絕憐慧眼明於炬

更識虬髯亦不難

奔拂

繡戶半開圓月臨。三更幽約苦相尋。當時若少豪奴助

其奈侯門似海深

盜綽

牀頭金盒折奸謀。絕代蛾眉解主憂。想得重來乘霧過

銅臺高揭月明秋

取盒

秋柳命懸難繫絲。脫鞋夢醒有餘悲。枉勞騎馬黃衫俠

憾不相逢未病時

夢鞋

一敗潼關非偶然。哥舒無奈外家權。若誅褒姒謝天下

須及鑿輿西狩前

驪宮

羅幃淚溼正愁儂。疇昔幽歡好夢濃。月轉西廂相別處

殘紅鋪地屐聲鬆

蒲東

秋自田園雜興

二分秋色此涼宵。賸得村家故習饒。瓜菓雜陳多所願。
絕憐乞巧小姑娘。板橋西畔橐駝家。培土灌泉生計嘉。例是清晨入城早。
擔將風露賣秋花。二百十日欣無風。滿篝滿車期歲豐。試上隴頭額手望。
稻雲漸黃斜照中。林端晚霽帶秋霞。野水半枯猶浴鴉。籬外紫薇花落盡。
西風廢徑兩三家。

槿籬茅屋午晴新。收穫西郊來往頻。飯後老翁拉孫去。
半汀紅蓼試垂綸。賸見瓜皮一片船。西風吹盪水生煙。橫塘昨日花如錦。
幾個新妝唱采蓮。社鼓逢逢稻熟天。踏歌聲裏賀豐年。黃雞白酒團欒飲。
醉倒野翁隨意眠。滿畦遺穗雀鴉呼。淨盡四郊斜日孤。欣見稻堆埋却屋。
兩鄰疇昔亦輸租。節到秋殘連日晴。紅楓烏柏看分明。一村雞犬都蕭寂。
不斷場中打稻聲。

曬穀纔終便候冬。細莎一路咽寒螿。晚來蕭寺疏鐘斷。
隔塢炊煙縷縷濃。
半林黃葉斂斜陽。墟落蕭條澹靄蒼。蕎麥花殘成子晚。
野田秋盡怯新霜。
野靄埋山月未生。夜遲村徑少人行。一林霜氣早寒裏。
幾處燈殘機杼聲。

題西村重長畫美人

絕憐懊惱苦尋思。愁上眉尖瘦到肢。第一銷魂誰認取。
碧紗幮底夜涼時。
俞紫芝猛虎一聲之句。王半山嘗激賞之。而其詩

前半不傳於世。予試補之。未知果得原意否。
落葉飄階寒透袍。黃庭誦罷試松醪。夜深童子呼不起。
猛虎一聲山月高。

橫川三松庸手書訂交。併似病起漫占之作。次韻
爲答。

幾載吾才漫自持。苦吟飯顆速人嗤。憑君今日賞音在。
珍重錦囊千首詩。
曾倚鵝湖山下樓。醉餘走馬指長楸。銀箏畫舫他年約。
煙水同尋故國秋。
落拓風塵鄉夢殘。江湖滿地酒闌珊。何時猿鶴閒爲伴。

去掃山中曬藥壇。

故山誰贈白雲心。無限關河落木深。悄地西風透衣冷。懷人滋味怯秋陰。

平生意氣寄醇醪。吟罷燈前擁短袍。灑灑鵝湖新水色。一杯春漲綠葡萄。

疊韻寄三松壽其五十初度。

吟骨初蘇須護持。年來二豎久嘲嗤。黃簾綠幙秋燈澹。賦得懷人幾首詩。病起先登湖上樓。悄看微月帶梧楸。夜深莫倚欄干立。消受笛邊風露秋。

鏡中憐看鬢華殘。遲暮詩名嚴海珊。此日湖山忽生色。居然筆陣冠吟壇。

昨非始悟昔賢心。五十人生感正深。聞道懺餘還止酒。倚聲莫譜醉花陰。

黃花會客薦新醪。絕唱何人奪錦袍。纔醒中山千日醉。紫霞觴泛碧葡萄。

次上村賣劍移居韻乃贈。

斐几湘簾試茗時。膽瓶好插菊花枝。移居頓覺開生面。遣興何妨戒後詩。

四壁芸香燈火親。讀書要掃滿胸塵。酒悲詩瘦憐同癖。

笑謝輕肥得意人

疏松密竹繞幽局。閒誦維摩一卷經。千里移來家具少。依然賸有舊氍毹。

身世終如不繫船。六塵難斷奈殘年。茶煙一榻閒分座。話到石門文字禪。

榛名山紀游六首

鐵軌車行快。似有風生腋。孱顏送迎頻。倚牕手加額。馬耳遙在東。黛痕林樹隔。晃山連赤城。北邊貫地脈。低昂亂嶂堆。南望峽天窄。武甲何峻巍。鍾靈神所宅。妙儀特巉巖。峰尖疑列戟。鄰之起淺間。噴煙從往昔。榛名當正

西勢如鳳矯。翮青峭欣無恙。明日重著屐。旋看晚霽分。嵐光刷空碧。桑柘殘照疏。疊翠渾欲夕。盪胸呼快哉。昨游試尋繹。名山指屈盡。無非振衣跡。

晚出澀川驛。當面凝嵐紫。輕車陟崇岡。荒塗何透邈。暝色濛四合。林木近竦峙。旅愁倏淒然。亂煙低墟里。車上屬腹藁。著筆從何始。所貴在折旋。詩境變無已。香山好仙寰。樓臺簇成市。投宿忘疲倦。溫泉疑洗髓。主人非生面。相邀兩情喜。一境靜于禪。宛在蕭寺裏。夜深無餘響。溪聲淨塵耳。古壁燈暈微。酒醒寒透被。唯冀明日晴。披衣起而視。繁星明屋檐。霜氣清如水。

三爲香山客。未賞香山秋。纔消平生恨。今日欣勝游。隔壑數峰峭。林麓插飛樓。步步近佳境。四圍霜葉稠。老黃雜渥丹。處處涼翠抽。爛然綺於錦。迴睇目無留。亂石奇而醜。起伏闖奔流。巖影碎又合。湍盡下成湫。積陰慘變晴。大地濃霧浮。賞心仍未飽。西風一蕭颯。猿澤稱趣絕。橋上暫夷猶。細徑旋斗折。崎嶇馬亦愁。溪枯樹漸禿。飢鳥聲啾啾。澗道寒何早。斧響山更幽。

驅馬度陂陀。所歷皆榛梗。泱泱野色荒。幾里無人境。緬想昨游日。乘晴佳趣永。攢峰兀當前。縱目得周省。素尙今睽違。宿霧藏遠景。斗覺半晌寒。淒與山氣併。亂雲塞

路深。何來雨勢猛。叢樾鳴蕭蕭。晦冥變俄頃。身落鋪海中。長風吹衣冷。天地乍白盡。據鞍仍矯頸。空埃陰霾消。霽日射遙嶺。路從湖岸轉。纔認前行影。寒鏡昏掩奩。難看翠鬢整。魚龍眠在淵。一汀漣漪靜。

峨峨天神嶺。立馬青冥上。煙嵐礙遠矚。惜無心目暢。一徑臨溪欹。數里秋澗漲。湍聲倍喧豗。水石不相讓。酣紅樹倒生。懸厓豎錦障。颯颯冷風過。墮葉隨波漾。忽見九折巖。雕鏤窮殊相。倚天森笏立。拔地絕依傍。鞍懸更怪奇。石梁勢何壯。或疑飲澗虹。凝作穹窿狀。水至祓橋迴。峽開漸夷曠。煙翦古木平。微暝界青嶂。神仙豈遠人。凡

骨無由訪。高詠招隱詩。予懷一悽愴。

萬巖怒撐空。紛錯難具數。樹色含雨幽。石氣結如縷。何年鏟鑿功。闢茲乾淨土。磴道攝衣登。祠前首爲俯。廟貌何森嚴。溪山映繡戶。俎豆歲月深。畫壁苔暈古。其神彥由岐。鴻荒奮威武。州俗頗尙俠。莫是遺澤普。想當夜闌候。百靈于此聚。老杉裂有聲。瑟瑟搗鼉鼓。昔日誇繁華。三千簇房宇。槿籬幾家存。墟落雞鳴午。寧言世運衰。禱之驗可觀。至今峰頂雲。百里降甘雨。

大正登極頌

大正四年乙卯十一月。今上天皇幸西都舉卽位

大禮草莽布衣。幸生神州。又值嘉辰。無勝抃躍之至。恭賦四言十二句十章。以志盛事乎萬一。且倣華封之祝意。其詞曰。

維大八洲。皇統一系。列聖相承。百廿二世。觀彼異邦。每有興替。朝不計夕。而事吞噬。帝登太極。龍飛乘勢。萬方瞻仰。日神之裔。昔在儲貳。廿載罔愆。文以治內。武以綏邊。爰踐其祚。日月高懸。四夷服焉。萬邦朝焉。蕩蕩難名。惟以配天。天錫壽祉。億萬斯年。允文允武。惟神惟聖。天祖有訓。明德秉正。茲卜嘉辰。鴻

儀肇盛。寶祚無窮。維天所命。上自百僚。下迄萬姓。歡天喜地。齊拜餘慶。

鸞車遠臨。平安之都。迺舉大禮。以恢皇謨。既告神祇。匪矜遠圖。福祉無疆。聖澤誕敷。拊石虞廷。擊壤堯衢。普天率土。誰不歡愉。

金天肅清。卿雲四興。黃菊始開。粲呈休徵。邊陲絕烽。禾穀頻登。聖躬福備。盛儀未曾。大聲颯颯。大明烝烝。如雷之震。如日之升。

臺南樺北。雨露既遍。遼左爲郡。權域爲縣。先皇之業。曠古罕見。帝紹其社。豈無天眷。昨拔青島。六師罷戰。今略

南洋。仁風遠煽。

四海一家。金甌無缺。日月光華。地靈人傑。傷哉歐土。頻年流血。哀哉禹域。妖雲方結。卓矣神州。億兆抃悅。何用致此。祖宗之烈。

鳳笙聲細。雙宮其肅。庭燎有晰。嚴祀勿速。於穆我皇。躬御齋服。瑞穗之饒。敬薦新穀。煮蒿悽愴。夜氣清淑。神之降矣。乃錫百福。

朝堂式燕。鴈鷺成行。欣欣抃躍。恭拜恩光。厥禮遵古。肅敬矜莊。仁惠及下。皇猷其昌。曰孤曰獨。俯頌吉祥。曰耆曰艾。仰捧杯觴。

法駕載旒兩驂如舞既謁諸陵歸告天祖鑿水之頭魏
魏祠宇威靈儼在凜凜萬古神宜呵護聖主多祐克禦
外侮建國以武

次永阪石埭 周留別詩韻

都門賦別謝塵緣當代誰如夫子賢松菊猶存迎舊主
滄江一臥托餘年祭詩悟到參禪境潤筆知非造孽錢
好是眼前開福地清風明月故依然
硯筐筆牀欣夙緣歸田計就趁前賢翻思郭泰同舟日
恰值陳囂賜杖年身健如松仍鍊藥心清於水不言錢
從來雋句又傳世絕勝騎驢孟浩然

從今桑梓了因緣賦到閒居憶昔賢識面之初如隔世
銷魂者別怕經年灌園兼見拓詩境款客寧言少酒錢
他日追隨洞天杳憶梅亭上月瑩然

君設別墅於月
瀨園曰憶梅亭

懷章枚叔 炳麟

翦燭玄談昔夢殘屋梁落月淚洑瀾青雲偉器苟文若
白帽高風管幼安千古恩讎招禍早終生慷慨濟時難
絕憐一去在羅網極目江湖夜色寒

戊戌變法中道蹉跌君與康梁諸輩
避難我邦予識面即在此際猶記嘗

論揚子雲太
玄徹宵不倦

悵絕曼珠廟略疏一朝變法竟何如清流已盡廷爭後
劇盜俄來黨錮餘他日江南愁亂禍孤身海上久離居

罪言自分功名薄。敢擬文園賦子虛。

曠古文章真可誇。出門白首費悲嗟。親朋一哭多為鬼。

晦跡十年寧憶家。翻見酖人羊叔子。誰憐憂國賈長沙。

傷心最是緹縈烈。丙舍臬啼夜月斜。

君為有力者所忌。終被拘禁。女某悲痛不禁。自縊死。云頃又傳君訃。然真

偽未可知禹域風雲慘不開。連宵惡夢苦疑猜。千秋變局河山碎。

四海群生溝壑哀。公路何心欲稱帝。老瞞當日尙憐才。

舉頭惟有天堪問。漫勸長星酒一杯。

詠松壽黑宮楠白石華甲

獨倚懸厓冷笑春。貞心勁骨玉嶙峋。為君此座寧相惜。

十畝清陰一榻陳。

歲晚書懷次賣劍韻

楫柁爐中熟芋魁。何須避債去登臺。檐角梅花忽吹氣。

上番春白酒邊回。

殘年塵事幾停杯。無力斜陽照碧苔。自笑書生寒乞相。

送窮矧少退之才。

名心一片冷於灰。怕見朱顏鏡裏頹。祭了惡詩三百首。

年年唯慣嘔心來。

次賣劍瓶梅詩韻

欣見頭番春早回。燈邊帳角數枝梅。可憐翠羽無聊賴。

青雲初志已成

罪言自分功名薄。敢擬文園賦子虛。

曠古文章真可誇。出門白首費悲嗟。親朋一哭多為鬼。

晦跡十年寧憶家。翻見耽人羊叔子。誰憐憂國賈長沙。

傷心最是緹縈烈。丙舍梟啼夜月斜。

君為有力者所忌。終被拘禁。女某悲痛不禁。自縊死云。頃又傳君訃。然真

偽未可知禹域風雲慘不開。連宵惡夢苦疑猜。千秋變局河山碎。

四海群生溝壑哀。公路何心欲稱帝。老瞞當日尙憐才。

舉頭惟有天堪問。漫勸長星酒一杯。

詠松壽黑宮楠白石華甲

獨倚懸厓冷笑春。貞心勁骨玉嶙峋。為君此座寧相惜。

十畝清陰一榻陳。

歲晚書懷次賣劍韻

楫樵爐中熟芋魁。何須避債去登臺。檐角梅花忽吹氣。

上番春白酒邊回。

殘年塵事幾停杯。無力斜陽照碧苔。自笑書生寒乞相。


送窮矧少退之才。

名心一片冷於灰。怕見朱顏鏡裏頹。祭了惡詩三百首。

年年唯慣嘔心來。

次賣劍瓶梅詩韻

欣見頭番春早回。燈邊帳角數枝梅。可憐翠羽無聊賴。



啼破羅浮仙夢來

流水空山彷彿看。小橫斜底倚孤寒。一生好伴梅花宿。

遮莫無人問考槃。

石門手筆竟難真。無垢乾坤著幻塵。昨夜一枝和月折。

依然斜影瘦如人。

壁間寫偈墨吹香。丈室三更笑倚牀。佛暈依稀燈影暗。

梅花燦放白毫光。

秋碧吟廬詩鈔卷三




正誤表				
卷	頁	行	誤	正
卷一、	四頁	九行	胃蝶	胃
卷一、	十九頁	十一行	既酣	宴
卷一、	廿二頁	廿一行	西宮	后
卷二、	十六頁	十五行	新詩	詞
卷二、	廿八頁	十七行	澗邊	溪


大正六年八月一日印刷
 大正六年八月五日發行
 定價壹圓

著者兼發行人
 久保得二
 東京市外巢鴨町上駒込十三番地

印刷所
 高桑基
 東京市京橋區西紺屋町二十七番地

發行所
 英舍
 東京市本郷區上富士前町十三番地





夢紅文香雅運啓
紅陽山



夢紅文香雅運啓



